

16-n-30 35 (3)



VIGILATE ET
ORATE.

SOLITVDO,
SIVE
VITASOLITARIA,

LAVDATA:

Cornelio Musio Delpho Encomiaſte.

Pſal. 54.

*Ecquis dabit columbinas
Lenes alas, alas bines,
Vt hinc volem properè,
Hactenus vt impeditus,
In Seceſſu expeditus
Valeam quieſcere?*

ANTVERPIAE,
Ex officina Chriſtophori Plantini.

M. D. LXVI.

CVM PRIVILEGIO.

VVILHELMVS DAMASI
LINDANVS DORDRACENVS,
LECTORI VERAE PIE-
TATIS STVDIOSO.

Musas qui coluit pientiores,
Hanc vitæ tibi practicen dicauit:
Quam si exercueris fide expiatus,
Certò hinc ad Superûm domos
migrabis.

IN CORNELII MVSII
DELPHI LIBELLVM DE SO-
litudinis Seceſſusꝛ commoditatibus,
Hadrianus Iunius Medicus.

MVNERA dum reſonas oti diuina beati
Aureus ore ſacro,
Dulciaqꝫ in numeros Seceſſus comoda conſers
Menti adamanda piæ:
Exceſſere ſuis adytis Heliconis alumne,
Carminibusqꝫ ſuis
Illeſta vatis, cantus odere profanos;
Teqꝫ mouente chelyn
Sanctiſonam, faciles aure indulſere ſecunda:
Ductor & ipſe gregis
Ter triplicis Phæbus viridi tibi tempora lauro
Sedulus implicuit,
Donatumqꝫ ſuis fidibus, virtuteqꝫ maſtum
Iuſſit abire ſua.
Cui calum ſauet, ac proprio quem nomine diue
Pegaſides decorant;
Victurum & ſcriptis genium conceſſit Apollo;
Maſte animo egregio:

A 2 Et

*Et dare, qui Musis placuit, Phœboque laborem
Nulla sit invidia,
Musum ut ediscant montes cum Vallibus, alta
Templaque te ingeminent.*

EIVSDEM IVNII AD

EVNDEM LIBELLVM.

*I AM Solitudo profer ora in publicum
Tandem, beata fomes otij, Deis
Accepta, turbæ exosa, grata vatibus,
Industrie altrix, ingeni excitabulum,
Tranquillitatis pabulum verè unicum,
Quietis alma dulce seminarium,
Fastus, simultatisq̃us lene pharmacum.
Exire herilem ne pudorem differas,
Refringe claustra, si teneris arctiùs,
Dic lucis vsuram negatam, sat diu
Iam ferre solis posse te clarum iubar.
Iam Solitudo profer ora in publicum.*

COR.

CORNELII MVSII DELPHI
MONASTICAE VITAE LAV-
DATAE RATIO.

QVANDO animo maestus nuper praesentia
flerem
Tempora, & innumeros ceco contendere cursus
Ad scelera adspicerem, seseque inuoluere seclis
Quotidie variis, adeoque in tartara nigra
Precipites ferri: prauos diuertere gressus
Vtile censebam penitus, Christoque fauente
Errantes reuocare animas, tutamque salutis
Commonstrare viam (si quis fortasse libenter
Audiet hos monitus, & seria dicta sequetur)
Et mecum meditans multum, quo carmine grato
Hoc opus aggrededer, tandem (vt iucundior essem,
Vtilis utque magis) genus illud versiculorum
Antiquum arripui, modulis quod pectora blandis
Saxeae mulceret citius: vel dulcius aures
In dexteras flueret, fixumque in mente sederet,
Et multos olim fructus & commoda ferret.
Hic est laudari scopus & ratio Monachismi,
Causaque Secessus numeris cur talibus exit.

LECTOR *antequam accedas,*
Aut priusquam hinc discedas,
Hoc lubens monuero:

Vt ex aquo arbitreris,
Et piè interpreteris
Quod hic cunque adfero.

Odiosum est damnare,
Et vix lecta confutare
Publico conuitio:

Candidum, examinare,
Et mendosa emendare
Vigilanti studio.

Qui non hæsitat scribendo,
Nec dormitat disserendo,
Qui verbo non labitur,

Is ex milibus selectus,
Inter & raros perfectus,
Dijs equandus creditur.

Interim mea committo,
Et Ecclesie submitto
Omnia iudicio,

Eius vt iudicature,
Et æquissima censura,
S tent, cadant arbitrio.

Porro

Porro autem hinc laudatum,
 Et Secessum pradicatum
 Eulogismis seriis,

Si te piget imitari,
 Saltem noli aduersari
 Improbis dictarijs.

Huius ergo te quarebam,
 Hoc erat quod te volebam,
 Ne sis importunior.

Nunc quo lubet hinc abito,
 Et cum voles huc redito,
 Sed semper candidior.

AD MVSAM, ENCOMII DEDICATIO.

MVSA calitus prognata,
 Quae nostra saepe vocata
 Expleuisti munia,

Musa pijs adamata,
 Et à multis celebrata,

Musa boni nuncia,
 Vise tandem Eremitas,
 Simul ipsos Cœnobitas
 Sancti patres nominis:

Vade ad religiosos,
 Viros Dei studiosos,
 Cuiuscunque ordinis:

Vade

*Vade, & his honoratis,
Prius & consalutatis,
Hunc libellum porrige:*

*Quem si quis fortè probabit,
Et quid reddet te rogabit,
Ora, dic, & dilige.*

*Inde, huc, illuc dedueta,
Et à Patribus instructa,
De fratrum concordia,*

*Te statim pijs mandatis,
Subijce & imperatis,
Multa cum modestia.*

*Mox à Deo benedictis,
Reuerenter valedictis,
Ac rogata venia,*

*Stude ilicet abire,
Et velociter redire
Tua ad officia.*

*Nam est rursum quod committam,
Et ad alios emittam
Nostri amantissimos,*

*Quos indignum non adire,
Et scelus sit præterire
Viros ornatissimos.*

38
SOLITVDINIS

SIVE VITÆ SOLITA-

RIAE ENCOMIVM, COR-

NELIO MV SIO DEL-

PHO ENCOMIASTE.

NON est idem vel scribendi,
Vel de rebus differendi,
Omnibus ingenium.

*Multa inge-
niorum va-
rietates.*

Huic vrbes, huic cantare,

Huic placuit laudare

Rusticanum prædium.

Ergo bellum hic Troianum,

Ille cecinit Thebanum,

Alius Pharsalium.

Quidam mero delectatus,

Maluit inebriatus

Scribere Symposium.

Est stultitiam exculto

Salte qui & satis multo

Extulit eloquio.

Rursum vnus nec errauit,

Gesta Christi enarrauit

Docto poëmatio.

B

Sunt

Sunt & multi petulantes,
Ac amoribus vacantes,
Qui commendant Venerem.

Fuit etiam amicæ
(Si diis placet) impudicæ
Qui defleuit passerem.

Quisque quicquid adlubescit,
Et quod animo dulcescit,
Hoc tractat lubentiùs.

Et quod vati dat Minerva
Non inuita nec proterua,
Hoc præstat feliciùs.

Nos ingenio exili:

Proposio.

Hebeti, tardo, senili
Pro nostris viriculis

Solitudinem cantamus,
Et ad vitam inuitamus
Priscis claram sæculis.

O beata Solitudo,

O sola beatitudo,

Pijs secessicolis!

Quàm beati candidati,
Qui ad te volant alati
Porro à Mundicolis!

Huc

Huc Vranie serena
Ades, & cælesti vena
Lauda Solitudinem.

Lauda bene, lauda sanè,
Lauda plenè, lauda planè
Hanc beatitudinem.

Lauda viros barba canos,
Lauda sôphos Christianos,
Duces abstinentiæ.

Lauda iuuenes præcinctos
Lumbis, atque sacræ cinctos
Balteo militiæ.

Lauda simplices, tenellas
Multas integras puellas,
Claras castimonia.

Lauda fœminas adultas,
Factas propter Christû stultas,
Raras sanctimonia.

Lauda firma Dei castra,
Quæ virtute tangunt astra,
Effugant Dæmonia.

Lauda solida exempla,
Ipsa viua Dei templa,
Dei ædificia.

Lauda specus & cascillas,
Lauda montes & rupellas,
Arctaꝛue tuguria.

Lauda(nam sunt tibi nota)

Tot Cœnobia remota,

Lauda Monasteria.

Lauda zelum & amorem,

Lauda æstum & feruorem

Primitus fidelium.

Lauda cursum huc frequẽtem,

Et confluxum diligentem

Hominum tot milium.

O beata Solitudo,

O sola beatitudo,

Pijs Seceſſicolis.

Quàm beati candidati,

Qui ad te volant alati

Porro à Mundicolis!

*Monastica
vite descri
ptio.*

Solitudo diuinarum

Est theſaurus gratiarum,

Sæculo abſconditus.

Solitudo optimorum,

Et donorum perfectorum

Ager est reconditus.

Soli-

Solitudo olim trita
 Est directa via vitæ,
 Est breue compendium.

Solitudo miserorum
 Est asylum peccatorum,
 Et tutum refugium.

Nusquam est in mundo tantum
 Commodarum rerum, quantum
 Datum Solitudini.

*Commodo-
rum enarra-
tio.*

Hic enim tranquillus portus,
 Hic deliciarum hortus,
 Paradisus Domini.

Hic lignum frondet vitale,
 Quod nefas tollit letale,
 Christi tinctum sanguine.

Hic stat arbor exaltata,
 Quæ secus riuos plantata,
 Viuo floret germine.

Domus hic orationis,
 Campus speculationis,
 In Dei operibus.

Hic mons contemplationis,
 Hic fons meditationis,
 In diuinis legibus.

ENCOMIUM

Hic est spiritus dulcedo,
Et perpetua viredo,
Multaque fertilitas.

Hic illi fructus triceni,
Sexageni & centeni,
Summaque felicitas.

O beata Solitudo,
O sola beatitudo,
Pijs Secefficolis!

Quam beati candidati,
Qui ad te volant alati
Porro à Mundicolis!

Hæc est vita speciosa,
Sacrosancta, fructuosa,
Si aduigilaueris.

Quæ plus habet in recessu,
Quam promittit in accessu,
Si perseueraueris.

Hic est cultus Dei verus,
Hic timor Dei sincerus,
Inculcata sanctitas.

Hic est fides solidata,
Spes & charitas firmata,
Raraque humilitas.

Soli-

SOLITVDINIS.

Solitudo non discorde,
Sed concorde Deum corde
Totis amat viribus.

Solitudo suos fratres
Omnes amat velut patres
Imis ex visceribus.

Solitudo Deo credit,
Nusquam à Deo recedit,
Quicquid tandem accidat.

Solitudo bene sperat,
Nunquam de Deo desperat,
Quæ res cunque incidat.

Solitudo spiritalis,
Quamuis desit corporalis,
Dulcis est possessio.

*Duplex So-
litud, spiri-
talis & Cor-
poralis.*

Solitudo corporalis,
Si non adsit spiritalis,
Vana est professio.

Nam quid foris profit ritè
Absque turbis, absque lite,
In speluncis degere:

Si intus perturbatarum
Vermes conscientiarum
Vetant conquiescere.

B 4 O beata.

O beata Solitudo,
 O sola beatitudo,
 Pij Seceſſicolis.

Quàm beati candidati,
 Qui ad te volant alati,
 Porrò à Mundicolis!

Spiritualis non moratur,
 Siue vrbe concludatur,
 Extra siue mœnia.

Modò vana ſpeculando,
 Et ſecurè iubilando,
 Vitet ſæcularia.

Qui, vt nil (quamuis vrbanus
 Habeatur aut mundanus)
 Ad mundanos pertinet:

- Ita nil, licet ruſtris
 Videatur aut ſylueſtris,
 Ad terrenos attinet.

Sed vbiuis de æterno,
 Et de folio ſuperno
 Inceſſanter cogitat.

Inque carne hic hærendo,
 Sed angelicè viuendo,
 Mente cælum habitat.

Interim hæc consecrata
 Vita, semper occupata,
 Simplex, Apostolica,

Est cælo, est Diuis grata,
 Est Ecclesiæ probata,
 Nempe Euangelica.

Quæ si erit literata;
 Studijsque dedicata;
 Plurimum contulerit.

*Solitudo li-
 terata.*

Sin istis non sit ornata;
 Nec de cælis illustrata;
 Tristis carcer fuerit.

Tolle literarum vsum
 Comparatum, vel infusum,
 Vita de Monastica;

Si non fiat cerebrosa,
 Stupida, vel furiosa,
 Saltem sit phantastica.

O beata Solitudo,
 O sola beatitudo
 Pijss Seccssicolis!

Quàm beati candidati,
 Qui ad te volant alati
 Porro à Muridicolis!

C

Mi-

Mirum, hic qua grauitate
 Mista cum humanitate
 Sit morum maturitas:

Sed multo magis miretur,
 Si quis intus contempletur
 Quæ sit vitæ probitas.

Castitas hic exaltatur,
 Rigor ordinis seruatur
 Cum perseverantia:

Regulæ disciplinaris,
 Disciplinæ regularis
 Viget obseruantia.

Quicquid iubet venerandus,
 Atque pater obseruandus,
 Fit cum reuerentia:

Nam ad nutum obeditur,
 Et ad iussum statim itur
 Absque resistentia.

Hic submissio perfecta,
 Dicta rata, vota recta,
 Sancta conuersatio:

Hic mandata sunt discreta,
 Hic obsequia sunt læta,
 Nulla excusatio.

Quæ

SOLITVDINIS.

Quæ sunt fratris, quærunt isti:

Non quæ sua, sed quæ Christi:

Abest hinc proprietas:

Mutuus hic animorum,

Et consensus studiorum:

Vna est societas.

Hic doctrina obseruatur,

Orthodoxis quæ probatur,

Profligatur falsitas:

Libri prauī non leguntur,

Nec quidem hic admittuntur:

Sic stat verbi veritas.

O beata Solitudo,

O sola beatitudo

Pijs Secessicolis!

Quam beati candidati,

Qui ad te volant alati

Porro à Mundicolis!

Hic paupertas opulenta,

Vita modicis contenta,

Nota spiritalibus:

Hic mœroris est solamen,

Hic laboris est leuamen

Abditum carnalibus.

ENCOMIUM

Quisquis agit in Seceſſu,
Iſthoc potitur ſucceſſu,
Quòd nunquam deſeritur.

Si ægrotat, viſitatur:

Si tentatur, confortatur:

Si fameſcit, paſcitur.

Si quid graue frater portat,

Frater hic fratrem ſupportat:

Fratrem frater ſubleuat:

Si quis mergitur peccatis,

Aut inuoluitur erratis,

Eſt qui illos alleuat.

Vis te Chriſto confecrate?

Carnem vis mortificare?

Locus hic aptiſſimus.

Vis offerre gratum munus?

Locus hic eſt oportuſ,

Locus commodiſſimus.

De peccatis vis dolere?

Vis ex corde pœnitere?

Vitam vis corrigere?

Hic ſecurè poſſis flere,

Omneſ culpam abolere,

Et poſt lapſum ſurgere.

Vis

Vis te rursus oblectare?

Mœstam mentem recreare?

Nusquam potes rectiùs.

Spiritum vis excitare?

Animum exhilarare?

Nusquam agas lætiùs.

O beata Solitudo,

O sola beatitudo,

Pijs Secessicolis!

Quàm beati candidati,

Qui ad te volant alati

Porro à Mundicolis!

Monachorum institutum

Non est nuper institutum,

Vt sectæ insaniunt:

*Monastici
instituti an-
tiquitas.*

Neque nouū est commentum,

Neque recens est inuentum,

Quod hostes obijciunt.

Sed annis ter quingentenis,

Ampliusque, quàm vicens,

Viguit Monastica.

A Christo enim incepta,

Ab Apostolis recepta,

Fuit Therapeutica.

ENCOMIVM

Quod si quis agrestiore,
Illamque incultiorem
Spectet Solitudinem:

A priscis illis Prophetis,
Et clavis Anachoretis
Vendicet originem.

O quantum auctoramentum,
Quale inauguramentum
Vita est Monachica!

O quam non terrena vita,
Quam supermundana vita
Vita Eremitica!

Dignitas. Quam licet Deo facundam
Sacro à Clero secundam
Dignitate feceris:

Multis tamen conuenire
Modis, dices aut præire,
Si rectè perpenderis.

Quanquam nec antiquitatem
Tanti, neque dignitatem
Viri Christo dediti;

Quanti vitæ probitatem
Facimus, & pietatem
Singularis meriti.

O beata

SOLITVDINIS:

O beata Solitudo,

O sola beatitudo

Pijs Seceſſicolis!

Quàm beati candidati,

Qui ad te volant alati,

Porro à mundicolis!

Nullus vates ſcribet rectè,

Nec Rhetor dicet perfectè

Laudes Mundifugiæ:

Tende vires, quantum pòtes,

Nunquam explicabis dotes

Vitæ ſolitariae.

Vbi eſt ſollicitudo,

Ibi falſa ſolitudo,

Multa immutatio:

Vbi vera ſolitudo,

Nulla eſt ſollicitudo,

Nulla eſt mutatio.

Vbi populus eſt multus,

Ibi multus eſt tumultus,

Multa eſt abuſio:

Ordo, vbi paucitudo:

Verùm vbi multitudo,

Ibi eſt confuſio.

Vbi

ENCOMIUM

Vbi bona comparantur,

Ibi mala euitantur

Vel absque negotio:

Vbi nunquam non oratur,

Vel vbi semper cantatur,

Quis ibi in otio?

Vbi nullæ vnquam horæ

Absque transeunt labore,

Absque ducta linea,

Non libenter operari,

Desidemus otiosi

Res ibi extranea.

Vbi quisque est modestus,

Ibi nemo est molestus:

Procul est discordia.

Vbi amor æquitatis,

Odium iniquitatis,

Ibi est concordia.

O beata Solitudo,

O sola beatitudo

Pijs Secessuicolis!

Quàm beati candidati,

Qui ad te volant alati

Porro à Mundicolis!

¶

Viri

46
SOLITVDINIS.

Viri hic religiosi,
Non sunt superstitioni,
Non sunt vt hypocritæ.

Per ambages non incedunt,
A receptis non discedunt,
Recto pergunt tramite.

E quibus licet Abbates
Eligantur, & primates
Omnium suffragio;

Pedum tamen non captatur,
Nec mitra desideratur:
Non est hic ambitio.

Quin plerique si cogantur,
Si vi multa adigantur,
Vti fiant Præsules;

Si non possunt detrectare,
Neque onus excusare,
Esse malunt exules.

Tantum abest, gloriosi
Hic vt sint, aut fastuosi,
Aut Thraſones tumidi:

Multo minùs moriones
Hic versantur, & Gnatones,
Vel lenones putidi.

D

Hic

Hic rixosus est exosus,
Murmurosus est explosus,
Exulant susurria:

Hinc proscriptus est delator,
Mendax, nugo, obrectator,
Vna cum calumnia.

Iam si nullos otiosos
Ferant, aut desidiosos,
Vt ipsi dissimiles,

An putes luxuriosos:
Tolarent, & ebriosos
Suibus persimiles?

O beata Solitudo,
O sola beatitudo.
Pijs Secessiculis!

Quàm beati candidati,
Qui ad te volant alati
Porro à mundiculis!

Nemo, quamlibet disertus,
Dixerit, nisi expertus,
Quanta hîc alacritas:

Nemo, quamlibet frugalis,
Scit, nisi spiritualis,
Quanta hîc frugalitas!

62
SOLITVDINIS.

Cellæ inspice ornatum,
Nihil inuenis ornatum,
Nihil superuacuum: *Frugalitas.*

Non ibi vana pictura,
Nec inutilis sculptura,
Nihil est superfluum.

Terra mensa, & cubile:

Terra scamnum, est sedile:

Terra oratorium:

Herba cibum, vnda potum,
Arbor vestem, antra notum
Præbent domicilium.

Non conducitur ad ædes

Aut ad exornandas sedes

Scitus operarius:

Neque luculentus focus,

Neque exquisitus cocus

Hic est necessarius.

Suas quisque struit casas;

Breues, humilesque casas,

Suis aptas vsibus:

Suos quisque carpit cibos,

Quos coctos, incoctos cibos,

Terra fundit omnibus.

D 2 Hic

ENCOMIUM

Hic rogare de Setinis,
Aut de vinis Tarentinis
Est superuacaneum:

Et de Ostreis Lucrinis,
Aut rogare de Echinis
Stultum, & frustraneum.

O beata Solitudo,
O sola beatitudo
Pijs Secefficolis!

Quàm beati candidati,
Qui ad te volant alati
Porro à Mundicolis!

*Mundi &
Solitudinis
Ant. isthesi*

Sed quis facilè narrarit,
Quanta Solitudo parit
Vera mentis commoda?

Ecquis rursum dicat, Mundus
Quid mali vehit fœcundus,
Quot adfert incommoda?

Mundus amat voluptates,
Risus, iocos, leuitates,
Ludos amat scenicos:

Monachi bene moratos,
Graues amant, & sedatos
Gestus Euangelicos.

Mundi.

Mundi incolæ laborant
Nouis sectis, quas ignorant
Tuta hæc refugia.

Mundus & impuritate
Gaudet, est salacitate:
Hic damnantur talia.

Mundus mutuum inuadit,
Cedit, perdit, morti tradit,
Nec parcit à fratribus:

Hic sub rubris Christi signis,
Vt quisque magis insignis,
Militat pro fratribus.

Mundus mero delectatur,
Et symposiis lætatur,
Appetit delicias:

Isti Deo dedicati,
Et Christo sanctificati,
Nesciunt lautitias.

Mundus quos odit, remotos
Porro mittit vltra Gothos,
Aut tollit exitio:

Sed viri Dei volenter,
Et æterno se lubenter,
Mancipant exilio.

•D 3 O beata

O beata Solitudo,
 O sola beatitudo
 Pijs Seccellicolis!

Quàm beati candidati,

Qui ad te volant alati

Porro à mundicolis!

Solitudo est virtutis,

Pacis schola, & salutis,

Summi sedes gaudij:

Mundus contra est malorum,

Et sentina vitiorum,

Iugis locus tædij.

Contumaces sunt Mundani,

Sunt mendaces, leues, vâni loquaci

Detractores, liuidi:

Eremitæ sunt veraces,

Æqui & iusti tenaces,

Amatores candidi:

In Mundo seditiones,

Et horrendas factiones

Sæpe mouent reprobi:

In Seccellu non rûmores,

Cædes, clades, nec furores

Audiuntur improbi.

Mun-

SOLITVDINIS:

Mundus saltat ad lasciuia,

Amatoria, nociua

Carmina spurcissima:

Isti vocē spiritali

Cantant Deo immortalī

Cantica sanctissima.

Mundus autor prauitatis,

Officina vanitatis,

Doctor iniustitiæ:

Solitudo pietatis

Mater est, & sanctitatis:

Doctrinā est iustitiæ.

Soli, quid agant expendunt:

Vident quorsum cuncta tendunt,

Multa cum industria:

Turbæ res bonas confundunt,

Et vappam mero infundunt:

Turbæ turbant omnia.

O beata Solitudo,

O sola beatitudo,

Pijs Secefficolis!

Quam beati candidati,

Qui ad te volant alati

Porro à Mundicolis!

Quam

ENCOMIVM

Quàm suavis,quàm quieta,
Quàm est læta,quàm secreta
Sola habitatio!

In turba nec hæc,nec illa
Hora vnquam est tranquilla,
Sed iugis turbatio.

In multis multum peccatur,
Et à vero aberratur
Vel toto itinere:

Sed horsum occasiones,
Minæ,vel promissiones
Magno virgent pondere.

Solis quidem & peccandi,
Et à recto deuiandi
Vt minor occasio:

Rectè quoque sic agendi
Est,& Deo seruiendi
Longè maior ratio.

Ergo turbæ sunt petacès,
Sunt furaces,sunt rapacès,
Colunt auaritiam:

Solis,Monachi prudentes,
Necessariis vtentes,
Proterunt pecuniàm.

Quoniam

Hinc

Hinc in Mundosunt elati,
Sicut vtres sunt inflati,
Turgidi iactantia:

Non sic isti, qui demissi,
Omni homini submissi,
Negligunt sublimia.

Hinc Mundani factum iurant,
Homines, nec Deos curant,
Se solos respiciunt:

Hi præ oculis habentes
Et Deum semper timentes,
Neminem despiciunt.

O beata Solitudo,
O sola beatitudo,
Pijs Secefficolis!

Quàm beati candidati,
Qui ad te volant alati,
Porro à Mundicolis!

Solitudo malum pellit,
Omne ad bonum impellit,
Solitudo afficit:

Solis Mundus malis gaudet,
Et mali nihil non audet:
Multos Mundus inficit.

mutual

E

Soli-

ENCOMIVM

Solitudo viros fingit
Bonos, & malos refingit;
Solitudo perficit.

Mundus plurimos disperdit,
Et atro veneno perdit;
Mundus multos conficit.

Solitudo ad fabellas
Non admittit intra cellas
Vllius consortium:

Ast Mundus absque delectu
Magno garrulis affectu
Cunctis pandit ostium.

Solitudo hospitalis
Est, & multum liberalis;
Lata fratres excipit:

Mundus nulli se exponit,
Nulli bono mensam ponit,
Nec egenos recipit.

Nulla lis est in Eremito;
Vbi pro terrenis nemo
Inuadendis militat:

Sed Mundus pro deuastandis,
Aut pro regnis occupandis,
Vel armis sollicitat.

Interim

Interim nil cella curat,
 Siue bellum Scotos yrat,
 Siue Anglos obruat:
 Siue hostis in Hispanos,
 Seu in Sueuos, seu in Danos,
 Seu in Gallos irruat.

O beata Solitudo,
 O sola beatitudo,
 Pijs Secessicolis!

 Quàm beati candidati,
 Qui ad te volant alati
 Porro à Mundicolis!

Hei quot Mundus celat vncos!
 Hamos quot iacit ad uncas!

Quot tendit insidias!
 Hei quot laqueos abscondit!
 Quot muscipulas recondit!
 Quot tegit astutias!

Mundus, Caro, & Satanas
 Animas quot perdunt sanas!

Quot mittunt ad inferos!
 Mundus, Caro, & Satanas
 Hei quot res promittunt vanas,
 Vt defraudent superos!

E 2 Tamen

ENCOMIUM

Tamen tuti sunt præfortes
Monachi, metus exortes,

Qui spirant ad prælia:

Quamuis enim soli degant,

Nec se Mundi armis tegant;

Sunt muniti gratia.

Nemo diris hic terretur,

Nemo mortem hic veretur:

Tanta est fiducia.

Nemo asperis diffidit,

Nemo prosperis confidit:

Tanta est prudentia.

Sed seu venti sint diuersi,

Seu fauentes, seu aduersi,

In vitæ discursibus;

Isti semper laudes dicunt,

Grates agunt, benedicunt

In lætis ac tristibus.

Sciunt enim abundare,

Et ærumnas tolerare,

Si Deus voluerit:

Sciunt quoque ieiunare,

Et subinde manducare,

Vt, res, cunque tulerit.

O bea-

O beata Solitudo,
 O sola beatitudo,
 Pijs Seceſſicolis!

Quàm beati candidati,
 Qui ad te volant alati
 Porrò à Mundicolis!

Sæpè quod eſt præſtitutum,
 Et quod ſemel eſt ſtatutum,
 Renouant propoſitum:

Vt ſeipſis fortiôres,
 Exequantur per Maiores,
 Quicquid eſt impoſitum.

Sed & numine repleti,
 Sunt in omnibus diſcreti,
 Vt iubet fraternitas.

Diſcretio.

Et nunc paulum curioſi,
 Nunc edunt nil ſerupuloſi,
 Quicquid dictat æquitas.

Sæpè ſunt tam abſtinentes,
 Vt nolint, quamuis egentes,
 Vti neceſſariis:

Rurſum cernas charitate,
 Siue motos pietate,
 Vſos eſſe variis.

molos

E 3

Sæpè

Sæpetantum subticendo

Profunt, quantum colloquendo

Auidi silentij:

Sæpe mæstis consulendo

Plus profunt, quàm reticendo

Diuites consilij:

*Omnia sur-
sum.*

Sursum versum corda gerunt,

Sursum cogitatus ferunt,

Et pia suspiria.

Sursum spem, fidem attollunt,

Sursum charitatem tollunt,

Sursum vehunt gaudia.

Sursum contemplationes,

Sursum meditationes,

Sursum desideria:

Sursum totus est affectus;

Vnde mentis est profectus,

Et virtutum præmia.

O beata Solitudo,

O sola beatitudo

Pijs Secefficolis!

Quàm beati candidati,

Qui ad te volant alati

Porro à Mundicolis!

Solem

SOLITVDINIS.

5 2
Bis

Solem maius luminare,

Sidera illuminare,

Vt minora cernimus;

Monachos sic eminere,

Cæterisque præluere.

In hac vita credimus.

Hi Deo sese conformant,

Dei se ad verbum formant,

Deo sese vniunt:

*Exercitia
pietatis.*

Sese in Deum transmutant,

Se absorbent, se commutant,

Se Deos efficiunt.

Deo votis se assignant,

Se & omnia resignant,

Sub eius dominio:

Nihil student, nec conantur,

Quàm Dei quem venerantur,

Obsequi imperiis.

Ab externis se auertunt,

Se introrsum prorsum vertunt,

Se in Deo colligunt:

Si secunda nunc immitat,

Nunc aduersa Deus mittat,

Æquè ipsum diligunt. A

Ni

Ni

ENCOMIUM

Nihil sunt(hoc primum discunt)

Nil habent,nil concupiscunt,

Solum Deum ambiunt:

Ipso solo sunt contenti,

Cuius bona piæ menti

Affatim sufficiunt.

Nullum sibi bonum scribunt,

Deo omnia ascribunt,

Et bonis spiritibus:

Malum Deo nullum scribunt,

Sibi omnia ascribunt,

Et malis spiritibus.

O beata Solitudo,

O sola beatitudo,

Pijs Secefficolis!

Quàm beati candidati,

Qui ad te volant alati

Porro à Mundicolis!

Absque creaturis degunt,

Se suosque sensus regunt,

Se curis expediunt:

Linguam valdè continenter,

Oculos indefinenter

A vanis custodiunt.

Abfit

SOLITVDINIS.

Abfit mentem vt ornatu,
Aut gustu, aut odoratu,
Aut auditu inquinant:

Abfit indecoro lusu,
Aut ingenij abusu
Animam contaminent.

Omnes oblectationes,
Atque consolationes,
Ponunt in cælestibus:

Euge Mundi fraudulentum,
Et fallax delinimentum
Viris cedunt mollibus.

Corrigunt affectiones,
Et conceptas actiones,
Si prauas inueniunt:

Cogitatus vitiosos,
Otiosos scrupulosos,
Velut angues, fugiunt.

Propter Christum cuncta linquunt,
Patrem, matrem derelinquunt
Dulci cum familia:

Vni Christo se impendunt,
Cuius nomine diuendunt,
Ampla patrimonia.

F

Imò

Imò propter Christum vadunt,
Et in mortem sese tradunt

Summa cum constantia:

Et qui Mundo cecidisse

Visi sunt, vel periisse,

Ipsi sunt in gloria.

O beata Solitudo,

O sola beatitudo,

Pijs secessicolis!

Quàm beati candidati,

Qui ad te volant alati

Porro à Mundicolis!

Sæpe, & multum tentantur,

Et à multis infestantur,

Homines sanctissimi:

Nulli tamen hosti cedunt,

Nec vlli quicquam concedunt

Pugiles fortissimi.

Contra Dæmones certare

Est iustis familiare,

Est penè assiduum:

Mundi astus declinare,

Carnis æstruin debellare,

Ferè est continuum.

Dæmo-

*Pugna &
victoria Mo-
nachorum.*

Dæmones nunc fide sternunt,
 Nunc Dei verbo prosternunt
 Multis cum ieiuniis:

Prece quoque subiugare,
 Illos solent, & fugare,
 Cruce & vigiliis.

Mundum superant latendo,
 Et promissa contemnendo,
 Mera vt ludibria.

Quòd si ita non succedat,
 Et despectus non abcedat,
 Vincunt patientia.

Carnis æstus furiosi,
 Valde sunt periculosi,
 Sunt violentissimi:

Quum tamen fide impugnant,
 Aut ieiunio repugnant,
 Cedunt velocissimi.

Sed quid attinet narrare,
 Hos quod hostes superare
 Monachi potuerint?

Quum seipsos vt laterent,
 Ac vt Deo adhærerent
 Strenuè deuicerint.

O beata Solitudo,

O sola beatitudo

Pijs Seceſſicolis!

Quàm beati candidati,

Qui ad te volant alati,

Porro à mundicolis!

*Viri ſancti
ludibrio
ſunt Mun-
danis.*

Viri Dei, & electi

A Mundanis ſunt reiecti,

Ac ſi eſſent ſtolidi:

Verùm pijs deamati,

Sunt ab ipsis reputati

Viri valde prouidi.

Illi ipſi Deo chari,

Digni à cunctis amari,

Sunt inuiſi ſeculo:

Et à ſtulto eminentes,

Ac miraculis pollentes,

Deluduntur populo.

*Interim lux
Mundi &
ſal terra
ſunt.*

Verùm qui ſic ſubſannantur,

Et vt fatui putantur,

Qui hic potant flumina:

Speculum ſunt imprudentum,

Et ſunt ſal inſipientum,

Sunt & Mundi lumina.

Addo

Adde qui sic contemnuntur,
Deprimuntur, exploduntur,
Et qui hic sunt minimi:

Postea exaltabuntur,
Gloria coronabuntur,
Habebuntur maximi.

Quos si forte Pharaones
Persequuntur, aut Neronēs;
Abdunt se latibulis.

*Persequun-
tio.*

Si iubet Deus prodire,
Pro fide mortem subire;
Obuiant periculis.

Post enim afflictiones,
Duros post mortis agones
Certum est resurgere:

*Fides resur-
rectionis*

Et per Christi passionem,
Mortem, resurrectionem,
Sperant semper viuere.

*Spes vita
aeterna.*

O beata Solitudo,
O sola beatitudo
Pis Secessicolis!

Quàm beati candidati,
Qui ad te volant alati
Porro à Mundicolis!

Iam, qui multi hic videntur,

Vnitatis Religionis. Monachi vnum fatentur
Fide, mente, actibus:

Nec ab vno sunt disiuncti,
Sed in vnum sunt coniuncti
Mutuis affectibus.

Vnde dicti Monachi. Neque Monachi dicuntur
Tantum, quod cellis abduntur,

Aut quod soli victitant,
Sed quod vno delibuti,
Et ab vno instituti,
Vnum bonum quæritant.

Varij cultus Religionem non variat. Nec ideo diuiduntur,
Variis quod discernuntur,
Mistisve coloribus:

Aut quod mæstis hi vtuntur,
Hi lætis amiciuntur,
Alijsve vestibus.

Sed distinctis colorati,

Qui putantur separati

His & his habitibus,

Vnum simul Deum volunt,
Indiuiduque colunt
Votis vniformibus.

Sciunt

Sciunt enim, quòd nitorem
Non curet, neque squalorem,
Neque formas vestium:

Qui mansuetis delectatur,
Et in intimis moratur,
Cordibus credentium.

Sic de Regulis censendum,
Ac de multis sentiendum,
Putas, Ceremoniis:

*Regulorum
& Ceremo-
niarum diuer-
sitas, vni-
tatem non di-
uidit.*

Quæ quantumlibet difformes
Pareant, sunt pariformes
Suis ex indiciis.

O beata Solitudo,
O sola beatitudo
Pijs Secessicolis!

Quàm beati candidati,
Qui ad te volant alati
Porro à Mundicolis!

Hi athletæ sunt zelosi,
Strenui, & animosi;
Stant pro Orthodoxia:

Et si (vt putas) respirant,
Nunquam tamen non suspirant
Pro eius iniuria.

Charitate

ENCOMIUM

Charitate radicati,
Et fide corroborati,
Ambulant intrepidi:

 Cælum terræ misceatur,
 Fractus orbis illabatur,
 Permanent impauidi.

Quàm humiliter incedunt,
Si quando foras procedunt,
Ad fratrum subsidia!

 Quàm sunt rerum negligentes,
 Quàm sunt rursus diligentes,
 In sui custodia!

Paci student & quieti,
Velut agni sunt mansueti,
Omnibus amabiles:

 Modò Deo sint amici,
 Nil curant si inimici
 Mundo sint odibiles.

Mundus amat adorari,
Par fas nefas dominari,
Et quod lubet agere:

 Isti Mundo nec placere,
 Didicerunt, nec timere,
 Sed palam contemnere.

Mundus

Mundus florēt, saltat, ridet,

Nec seipsum satis videt

Multa præ superbia:

Interim Sancto Sanctorum,

Grege abiectus Monachorum,

Pfallit cum lætitia.

O beata Solitudo,

O sola beatitudo,

Pijs Secefficolis!

Quam beati candidati,

Qui ad te volant alati,

Porro à Mundicolis!

Pfallunt manè absque mora, *Psalmodia.*

Prima, tertiaque hora,

Ante solis aditum:

Sexta, nona, vespertina,

Pfallunt hora, sed diuina *Hora Canonicæ.*

Complent sub occubitus.

Sed & carnis fauciata,

Et subinde vitiata,

Vt petant remedia:

Sæpius euigilantes,

Et ad preces festinantes,

Nocte surgunt media.

G

Quos

Quos si videas plorantes,
 Si psallentes, si orantes,
 Suis pro reatibus:

Mirum si non ipse plores,
 Si non psallas, si non ores,
 Pro tuis criminibus!

Adeò sese submitunt,
 Se prosternunt, se demittunt,
 Ut si essent infimi:

Tam profusè lachrymantur,
 Sic vindictam deprecantur,
 Ut si essent pessimi.

At non frustra plurimarum
 Riuos fundunt lachrymarum,
 Nec sunt frustra supplices:

Nam humilibus addictus
 Deus, ac velut obstrictus,
 Semper audit simplices.

Hei ter quater infelices
 Nos, sed illos ô felices,
 Qui hic curant ardua!

Sic enim fas inuenire
 Gratiam, & peruenire
 Ad regna perpetua.

O bea-

O beata Solitudo,

O sola beatitudo,

Pijs Seceſſicolis!

Quàm beati candidati,

Qui ad te volant alati

Porro à Mundicolis!

Sed non ſemper ſoli mœrent

Monachi, nec ſemper hærent,

Intra oratoria:

Sed ob cauſas conuenire

Illis licet, & exire,

Ad pia colloquia.

Quando autem congregantur,

Non defriuolis nugantur,

Nec enarrant ſomnia:

Sed de ſumma Maieſtate,

Et Chriſti humanitate,

Prima eſt materia:

Mox de culpis extirpandis,

Et ſilentiis ſeruandis,

De Dei iuſtitia:

De ærumnis Inferorum,

De triumphis Superiorum,

Multa tractant ſeria.

*Colloquiaſi
ue Collatio-
nes Mona-
chorum.*

Posthæc de tentatione,
 Et exercitatione,
 Grauis sermo oritur:

Multum & Dei narrandis
 Et donis enumerandis,
 Temporis impenditur.

Quàm de gratiis agendis,
 Et de laudibus canendis,
 Hilares definiunt:

At diem illum supremum
 Et iudicium extremum,
 Quo fletu discutiunt!

Interim in Cruce Christi,
 Ac in morte eius tristi,
 Lætaque victoria,
 Inter istos seruos Dei
 Fide firmos, plenos spei,
 Tota est memoria.

O beata Solitudo,
 O sola beatitudo
 Pij Seccellicolis!

Quàm beati candidati,
 Qui ad te volant alati
 Porrò à mundicolis!

Iam

Iam quum sacris operantur,
 Aut dum sacra celebrantur,
 Et sacris communicant:

Quo affectu se adornant,
 Vel quo mundo se exornant,
 Quibus se purificant:

Qualia tunc meditantur,
 Qualia tunc speculantur,
 Quæ tunc mente agitant:

Dicas quod Christo immerſi,
 Et à cunctis quod auerſi,
 Extra ſeſe volitant.

Tali veneratione,
 Tali trepidatione,
 Hanc ad cœnam adeunt:

Tali exultatione,
 Tali modulatione,
 Ab hac menſa abeunt.

Sed huc quoties accedunt,
 Ne offendant quum recedunt,
 Aut huc quando properant:

Prius per contritionem,
 Et veram confessionem,
 Se culpis exonerant.

*Quomodo
 vel ipſi ſa-
 crificantes
 vel aliorũ
 ſacra audiẽ
 tes ac com-
 municantes
 ſe gerũt Ma-
 nachĩ.*

ENCOMIUM

Sic demum se immortali
Christi pane, ac vitali
Corpore communiunt:

Sic demum Christi cruore,
Quem nostri fudit fauore,
Sese totos fulciunt.

Et sicut hoc testamentum,
Hocque curant sacramentum,
Ut degustent candidi:

Ita postquam sunt nutriti,
Cauent ne sacris muniti,
Rursum fiant sordidi.

O beata Solitudo,
O sola beatitudo
Pijs Secciscolis!

Quam beati candidati,
Qui ad te volant alati
Porro à mundicolis!

Hi quum sciant rugientem
Beluam, nunquam sterrentem,
Circuire sedulo:

Cauti, ne perdat, obsistunt,
Et multa fide resistunt
Vigiles diluculo.

Huius

Huius ergo semper sistunt
Christo sese, nec desistunt,
Donec exaudierit:

Ergo cæli pulsant fores,
Neque cessant pulsatores,
Donec liberauerit.

Hi sunt qui non infoderunt,
Sed talenta expenderunt,
Ad quæstum ditissimum:

Qui & agros rigauerunt,
Vineam excoluerunt,
Ob lucrum certissimum.

Qui & rete ad capturam
Mittunt, minas ad vsuram
Credunt numulario:

Qui & cuncta vendiderunt,
Proque vnus dederunt
Margaritæ precio.

Hi sunt iugum qui suaue,
Et illud portant non graue,
Onus Euangelicum:

Vt quietem possidere,
Vtque fructum obtinere
Valeant saluificum.

O seruos

ENCOMIUM

O seruos Dei beatos,
Quos, cùm venerit, paratos
Dominus inueniet:

Quos & idem vigilantes,
Ac piè negotiantes,
Rediens reperiet.

O beata Solitudo,
O sola beatitudo,
Pijs Secessu colis!

Quàm beati candidati,
Qui ad te volant alati
Porro à Mundicolis!

*Mundus hu-
iusmodi vi-
ros non ha-
bet.* Ecquid tale profert Mundus,
Mundus nil minus quàm mundus,
Mundus immundissimus:

Qui nunquàm non fuit bonis
Sacrae vineae colonis
Iure indignissimus.

Rara avis est in vrbe,
(Ne mendaci credè turbæ)

Vir absolutissimus:

Sed perfectus in Deserto,
In Secessuque pro certo,
Vir est frequentissimus!

20171 O

Nec

Nec enim Mundanos dicam,
 Qui vel vnam Mundi micam,
 In se habent minimè:

Sed ad sanctum illi gregem,
 Qui sanctorum seruant legem,
 Pertinent æquissimè.

Vbi vbi sis locorum,
 Si piorum normam morum
 Exprimis legitime:

Semper eris Deo gratus,
 Et cum iusto computatus,
 Populo certissimè.

Sodoma quid inquilino,
 Licet reprobis vicino,
 Quid impura nocuit:

Et Lucifero funesto,
 Deo cum suis infesto,
 Quid cælum quid profuit:

In mente est Solitudo,
 Et vera perfectitudo,
 Vbicunque habites:

Interim præstat, securus,
 Quo magis agas, obscurus,
 Si seorsim latites.

H

O bea-

O beata Solitudo,

O sola beatitudo,

Pijs Secelsicolis!

Quàm beati candidati,

Qui ad te volant alati

Porro à Mundicolis!

Nullus locus, vt videmus,

Ex via Ma Prius ducit quàm Eremitas,*nastica pro* Ad cæli palatia:*clius ad ce* Nullus Mundus sic dicere,*lum via est.* Nullæ Vrbes sic beare,

Nulla potest Regia:

Clarissimo Nunc Vranie benigna,*runt quorū* Digniorum laude digna,*dam Solita* Dic Patrum vocabula:*riorum No* Dic quos cellæ educarunt,*mēclatura.* Et quos viros illustrarunt,

Sola habitacula:

Adam ille primus homo,

Pulchro qui decēptus pomo,

Seque nosque perdidit,

Solutus vixerat beatus,

Solutus erat exaltatus,

Comitatus cecidit.

Solutus.

SOLITVDINIS.

Solus gaudet, feriatur,
Non laborat, non tristatur,
Multo felicissimus:

Comitatus in algore,
Patem querit & sudore,
Vir infelicissimus.

Solus Patriæ cælestis
Ciuis fuit, mox agrestis,
Consort fit exilij:

Solus fuit immortalis,
Comitatus fit mortalis,
Primi exors solij.

Vndediscas quid sperare,
Aut quid possis expectare,
De puella socia:

Si solum pulchrè florentem,
Socium fecit marentem,
In multa miseria.

O beata Solitudo,
O sola beatitudo
Pijs Secessicolis:

Quam beati candidati,
Qui ad te volant alati,
Porro à Mundiculis

doce

H 2

Odor

Odor hic Abeli gratus,
Fuit Enoch hinc translatus,
Vitæ vir sanctissima:

Noe quoque hic laudatus,
Qui cum paucis conseruatus,
Vixerat iustissime:

An putes quòd laqueato,
Abrahamus aut aurato,
Confidet in folio:

Quum Dei qui est in cælis,
Gentium pater fidelis,
Fruitur colloquio:

Nec in vrbibus sedebat,
Quando tres excipiebat
Angelos hospitio:

Sed sub quercu expectabat
Peregrinos, quos tractabat,
Splendido conuiuio:

Puteus ille viuentis,
Isaaco, & videntis,
Cæteris sapidior,

Satis docet, Solitudo,
Quòd illi quàm multitudo,
Longè esset gratior,

SOLITVDINIS.

Iacob fratris supplantator,
Scelerumque conculcator,
Vbi scalam conspicit?

Moses, hostes precum armis,

Cætera totus inermis,

Vbi fusos aspicit?

Parcius præclare facta,

Intra Vrbes sunt peracta,

Plurimis præsentibus:

Sed in cellis, subve Solis

Vimbra, Deus sæpe solis,

Mira fecit Patribus

O beata Solitudo,

O sola beatitudo,

Pijs Seccellicolis!

Quàm beati candidati,

Qui ad te volant alati

Porro à Mundicolis!

Hic insignes tot Prophetae,

Hic inuicti tot Athletæ,

Decertarunt acriter:

Hic & Virgines decentes,

Viduæque continentes,

Substiterunt fortiter.

David ille rex inuictus,
 Corde admodum afflictus,
 Præ suis sceleribus:

Huc sæpissimè confluit,
 Hic peccata sua luxit,
 Derelictis Urbibus:

Hinc Helias vita rectus,
 Igneo est curru vectus,
 Mundi à nequitia:

Hic & plurima successor
 Helizeus, vt præcessor,
 Palluit inedia.

Quin & Christus hic prostrauit,
 Satanamque superauit,
 Scripturarum iaculis:

Idem multas saturauit,
 Turbas hic, & prædicauit,
 Editis miraculis.

Et quum iam suos formaret,
 Et arcana explicaret,
 Solus esse maluit:

Solus precibus vacauit,
 Et dum se transfigurauit,
 Solus cum solis fuit.

Angelus quum salutaſſet,
 Spiritus quum obumbraret,
 Sola erat Maria:

Sola iuit ad Montana,
 Multa anui humana,
 Vt ferret obsequia.

O beata Solitudo,
 O sola beatitudo,
 Pijs Seceſſicolis

Quam beati candidati,
 Qui ad te volant alati
 Porro à Mundicolis!

Huc Baptiſta vixdum natus,
 Confugit, Mundi mundatus,
 Timens à contagio:

Hic pauciſſimè nutritur,
 Tenuiſſimè veſtitur,
 Tegitur tugurio.

Hic & nobilis peccatrix,
 Priſcæ vitæ caltigatrix,
 Agit pænitentiam.

Ac Dei ſola timore
 Nixa, ac feruens amore,
 Hic exorat veniam.

Paulus ardens huc volauit,
 Quem per coruum Deus paut,
 Quum adest Antonius:

Idem rectus hic orauit,
 Hinc ad superos migravit,
 Quum abest Antonius.

Qui velut antesignanus,
 Mille miles veteranus,
 Cum monstis congregitur:

Et quantumuis oppugnatus,
 Victor semper coronatus,
 Ab illis digreditur.

Hic Hilarion mansuetus,
 Cum Dæmonibus assuetus,
 Superat assidue:

Hic Macharij silentes,
 Ephrem & Theon feruentes,
 Vigilant continuè.

Hic Amona se exercet,
 Se Pityrion coërcet,
 Seruusque Serapion:

Idem facit Eleemon,
 Et asceticus Chereimon,
 Laususque Bilarion.

Obca-

O beata Solitudo,

O sola beatitudo,

Pijs Seceſſicolis!

Quàm beati candidati,

Qui ad te volant alati,

Porro à Mundicolis!

Vigil hîc Nazianzenus,

Et magnus Cappadocenus,

Longo exercitio:

Annis tredecim probati

Merito sunt decorati,

Chriſti Pontificio.

His Chryſoſtomum adiungens,

Nec Eulogium diſiungens,

Adde Athanaſium:

Adde quoque Emiſenum

Et pium Samofatenum,

Et clarum Euagrium.

Chronium, Scuerianum,

Dorotheum, Iulianum,

Pamphilum, Arſenium:

Theodorum Iſidorum,

Abraam, Heliodorum,

Domnion, Paphnutium.

I

Et

ENCOMIUM

Et quur differo Martinum,
VVillibrordum, Cælestinum,
Lullum, Bonifacium?

Quid ad oram Phrygiensem,
Exulem, Pictaviensem
'Transeo Hilarium?

Nefas fuerit Brunones
Præterire & Hugones,
Et cellas Carthusias:

Culpa nec minor Amones,
Præterire & Pambones,
Et casas Ægyptias:

Et æquum sit Benedictum,

Sunt qui re Verè illum benedictum,
ferant Cæ-
nobis D. Milleque collegia:

Benedicto Et melliflui Bernardi:
dicata Subticere & Lunardi,
(quas Ab- Sacra sodalitia?

bantias vo- O beata Solitudo,

cant) septē O sola beatitudo,

supra trigin-
sa millia v- Pijs Secefficolis!

no tempore
extitisse. Quàm beati candidati,
Qui ad te volant alaci,
Porro à Mundicolis!

Pene-

Penetra Casum montem,
Vallem claram, clarum fontem,
Fac, quæso, periculum:

Lustra oras Asianas,
Europæas, Africanas,
Totum orbis circulum:

O quot celebres offendes,
O quot pios depræhendes,
Viros hic asceticos!

O quantum & tunc gaudebis,
Quum innumeros videbis
Viros theoreticos.

Hic videbis Augustinum,
Et Ambrosium diuinum,
Vixdum imitabiles:

Hic Eusebium doctorem,
Hic Gregorium pastorem,
Patres admirabiles:

Hic procedent Præmonstrati,
Cultu candido ornati,
Iesuique feruidi:

Hic occurrent VVilhelmitæ,
Carmelitæ, Ioannitæ
Minimi que pallidi.

ENCOMIUM

Hic sancti Cluniacenses,
Integri Cistercienses,
Duri Ciliciferi:

Hic demissi Franciscani,
Hic graues Dominicani,
Fortesque Crucigeri.

Sed stellas vult computare,
Qui vult Patres numerare,
Sacre Solitudinis.

Tot addicti amatores,
Tot olim erant cultores,
Huius quietudinis:

O beata Solitudo,
O sola beatitudo,
Pijs Secessicolis!

Quam beati candidati,
Qui ad te volant alati,
Porro à Mundicolis!

At quis fœminas narrabit,
Virginumque indagabit,
Casta contubernia?

Quis harum integritatem,
Scribetque alacritatem,
Dicet exercitia?

Quis

Quis Anitam, quis Albinam,
Iphigeniam, Sabinam,
Candidam, Gelasiam?

Aut quis memoret Maranam,
Alexandram, Iulianam,
Martham & Olympiam?
Aegrè, sed tamen Iubinam,
Et transilio Saluinam,
Magnam & Syluaniam:

Præter quod, eo Blefillam,
Cum Photina Bafinillam .
Claram & Melaniam.
Et quid Paulam, aut Marcellam,
Theodoram aut Afellam
Dicam, aut Eustochium?

Quum sola signis notare,
Nomina vel recitare,
Nullum possit otium.
Nos ad finem aspiramus,
Et his pauculis putamus,
Sat dictum beneuolis.

Nec enim exemplis cultis,
Quamuis veris, quâuis multis,
Satis fit maleuolis.

ENCOMIUM

Interim procul discedat,
Nec ad sacra hæc accedat,
Quisquis est leuiculus:

Procul absit hinc prophanus,
Ac Mundi philtro infanus,
Vrbes colat æmulus.

O beata Solitudo,
O sola beatitudo,
Pijs Secessicolis!

Quàm beati candidati,
Qui ad te volant alati,
Porro à Mundicolis!

Age verò qui hæc audis,
Cui huius carmen laudis,
Nil, puto, displicuit:

*Ad Mona-
sticen ex
hortatio.*

Cui nullus blandiendo,
Pollicendo, largiendo,
Mundus nimis placuit.

Age & his excitatus,
Et huc toties vocatus,
Surge, veni, propera:

Hic suauius sedebis,
Hic tranquillius manebis,
Excute tot onera.

Linque

Linque Mundo suos numos,

Gloriarum sperne fumos,

Fuge innotescere:

Et postquam inemptum holus,

Dulce sapit, viue solus,

Ama delitescere.

At Pater (inquis) obsistit,

Et Mater nunquam desistit,

Reuocare fletibus:

Sed & liberi subinde

Me demulcent hinc & inde,

Dulcibus amplexibus.

Fuge derelicto Patre,

Et inuita perge Matre:

Non est hæc impietas.

Sed si per tot moras rumpis,

Si hæc vincula disrumpis,

Hæc demum est pietas.

Nam licet sit concedendum,

Et parenti obsequendum,

Si quid tibi iusserit:

An non magis auscultandum

Et Christo obtemperandum,

Quo, te, cunque traxerit?

Obea-

O beata Solitudo,
O sola beatitudo,
Pijs Secessuiculis!

Quàm beati candidati,
Qui ad te volant alati,
Porro à Mundiculis!

Non vides calamitosa,

*A temporis
calamitate:
sine à cor-
rupto huius
seculi statu.* Turbulenta, factiosa,
Tempora tristissima?

Non vides conscelerata,
Impia, exulcerata,
Secula nequissima?

*Hæretici
numero vin-
cent Catho-
licos.* Numeras, si potes, sectas,
In tam multas partes sectas,
Numeras Hæreticos:

Fallor, si non pauciores,
Si non numero minores,
Inuenis Catholicos.

Nec enim tantum Vicanis,
Neque solis Oppidanis,
Simulati præsident:

Sed & totas regiones,
Regna, aulas, ditiones,
Violenti possident.

Templa

SOLITVDINIS.

Templa Dei euerterunt,
Et in stabula verterunt,
Multa contumelia:
Virgines constuprauerunt,
Viduasque affecerunt,
Grandi ignominia.

Sacrificiis dicatae,
Aræ sunt contaminatae,
Sacraque communio:
Missæ sacræ sunt abiectæ,
Ceremoniæ despectæ,
Vetusque religio.

Dies festos sustulerunt,
Venerandas abstulerunt
Martyrum exuuias:
Ossâ sacra combusserunt,
Et in fluuen proiecerunt
Cinerum reliquias.

O beata Solitudo,
O sola beatitudo,
Piis Secefficolis!
Quàm beati candidati;
Qui ad te volant alati,
Porro à Mundicolis!

*Quid designarunt olim
aut quid designant adhuc
Hæretici.*

K

Di-

Diuûm inuocationem,
Simul intercessionem,
Tollunt & subsidium:

Ignem cum Præbyteratu,
Cumque toto Monachatu,
Rident purgatorium.

Sacramenta corruperunt,
Et septena redegerunt
Ad multo paucissima.

Quidam vnum statuerunt
Duo alij sanxerunt,
Tria vel quàm plurima.

Nunc Baptisma iteratur,
Nunc totum oblitteratur
Pro ipsorum placito:

Sola fides stabilitur,
Opus bonum fastiditur,
Viuitur pro lubito.

Sacras benedictiones,
Vocant execrationes,
Et meras offucias:

Et exorcizationes,
Atque eiurationes,
Æstimant præstigias.

Quid

Quid sacratum quod vnguentum,
Magnum initiaamentum,
Sordibus inficiunt?

Quid ritus quod vetustorum,
Patrumque pientiorum,
Penitus abijciunt?

Verbum Domini secare,
Et purè annunciare,
Sese solos asserunt:

Sed nihil quàm vitiatum,
Et fœdè adulteratum,
Mentientes adferunt.

O beata Splitudo,
O sola beatitudo,
Pijs Secefficolis!

Quàm beati candidati,
Qui ad te volant alati,
Porro à Mundicolis!

Crucis admirandum signum,
Et tam preciosum lignum,
Dedignantur colere:

Nec in locis consecratis,
Nec in ædibus priuatis,
Sustinent reponere.

K 2

Quid

Quid dicam de Electorum,
 Simulachris? aut Diuorum,
 Quid de imaginibus?

Quas omnes, has decollatas,
 Has manus, pedes truncatas,
 Tradiderunt ignibus.

Hei quot sunt dirè tractati,
 Nec simpliciter maectati,
 Viri pientissimi:

Sacerdotes non insulsi,
 Hei quot templis sunt expulsi,
 Ceu canes spurcissimi.

Nihil dicam de rapinis,
 Quas sacrilegi diuinis,
 Vel ex aris auferunt:

Nec de splendidis culinis,
 Nec dicam de concubinis,
 In quas rapta conferunt.

Petri Cathedra ridetur,
 Nec illis pluris habetur,
 Quàm anilis fabula:

Si quis contrà vult docere,
 Ac diuersum persuadere,
 Ducitur pro rabula.

Non

Non agnoscunt sanctitatem,
 Nec ferunt auctoritatem,
 Principis Ecclesiæ:

Cuius constitutiones,
 Canones, & sanctiones,
 Exusserunt impiè.

O beata Solitudo,
 O sola beatitudo,
 Pijs Secessicolis!

Quàm beati candidati,
 Qui ad te volant alati,
 Porro à Mundicolis!

Libros sacros discerpserunt,
 Et picturas expunxerunt,
 Sacris cum Historiis:

Sed & totum (ni vetantur)
 Christum tollere conantur,
 Nostri ex memoriis.

O vos Christi perduelles,
 Orthodoxiæ rebelles,
 Antichristi milites:

*Exclama-
 tio in Here-
 ticos.*

Quando tandem desistetis,
 Aut quando resipiscetis,
 Vos Orci satellites?

K 3

Sed

ENCOMIUM

Sed me piget propalare,
Publicè quæ perpetrare,
Istos nondum piguit:

Quos nec cælum defraudare,
Neque terram perturbare,
Hactenus non puduit.

Et adhuc liber cessare,
Et in annos protelare,
Vota tam feruentia?

Quæ te saga fascinauit,
Quæ vis mentem immutauit,
Quæ est hæc dementia?

*Apericulis
presentib.*

Qui vult picem contrectare,
Se vult ipsum inquinare,
(Vt habet adagium)

Tu in medio luporum,
Habitans Hæreticorum,
Non times contagium?

Fuge ne inficiaris,
Fuge ne his inuoluaris,
'Tutas intra latebras:

Fuge pestes animarum,
Ne æternas furiarum
Incidas in tenebras.

Obca:

SOLITVDINIS.

O beata Solitudo,

O sola beatitudo,

Pijs Seceſſicolis!

Quàm beati candidati,

Qui ad te volant alati,

Porro à Mundicolis!

Phœnix Chronius ſeuerus,

Vir ſibi multum aſterus,

Dum Mundum effugeret:

Redeundi ſpem abegit,

Et à tergo pontes fregit,

Ne rurlus aufugeret.

Quid cunctaris? quid excuſas?

Quid cauſaris? quid recuſas?

O infelix anima.

Anneſcis quod tempus fluit?

Et præcepſ quod dies ruit?

Quod hora nouiſſima?

Nil eſt cur te ita turbes,

Felix eſt qui fugit vrbes:

Fuge, & beaberis:

Fuge, tace, & quieſce,

Carnis remoram compeſce,

In monte ſaluaberis,

*Ab exēplo
Chronij.*

*A temporis
breuitate.*

A felicitate

*Vox celeſtis
ad Arſeniū
Senatorem
poſtea Mo-
nachum.*

In

ENCOMIUM

In turba stare illeſum,
Et tibi videre Ieſum,
Valde eſt difficile:

Sed in ſycomoro verè
Ipſum ſpiritu videre,
Admodum eſt facile.

At tu triſtior hortantem,
Et gemens audis laudantem,
Huius vitæ ſeriem:

Nempe aliam externam,
Hic fortassis vel internam,
Somniaſti requiem.

*A periculis
futuris.*

Vt vis, ſed quum ægrotabis,

*Vinā Mū-
di pompis
nunciū re-
miſſem.
Vinam vi-
xiſſem Ere-
mita.*

Iuſtis lachrymis damnabis,

Omnes Mundi infuſas:

Et quum morti propinquabis,
Tunc, ſed ſerò prouocabis,
Ad beatas cellulaſ.

*Exēpla ſunt
inſinita.*

O beata Solitudo,

O ſola beatitudo,

Pijs Seceſſicolis!

Quàm beati candidati,
Qui ad te volant alati,
Porro à Mundicolis!

CHRO-

CHRONICA HVIVS ENCOMI CONCLUSIO.

SANCTAE VITAE PRAXIN SCRIPSI
SPONTE QVAM SEQVNTVR IPSI
VERE SOLITARI.

SI OFFENDO NON SEQVENDO,
AVT SI ERRO DESCRIBENDO,
CEDO: PRAESTENT ALII.

LECTORI.

*Non hic displiceat Lector tibi carminis huius
Consonus vsque sonus.
Sic Sanctus Thomas scripsit: sic Victor Adamus,
Hymnographique Patres.*

VRBANI ET SOLITARI COLLOQVIVM.

*Vrbanus celebrem Monachum quum viseret, atque
Attonitus frontemque hilarem, corpusque videret,
Ut prius infractum, verbis affatur amicis,
De multisque rogat hominem (num pectore aperto,
An flecto incertum, nisi quod discederet illinc
Nondum persuasus tali se credere vite)
Quicquid id est, solido stantes in cespite, tandem
Alternis breuiter vicibus, hac seria tractant.
Et prior Vrbanus, vegeto (inquit) corpore quum sis,
Ecquid edis quæso? SOL. panem modicumque polenta*

L

Atque

Atque olus interdum, tenui aut cum lacte legumen.

Vrb. *Hæc tibi solus habet: sed lasso porrige potum.*

Sol. *Ecce tibi ante pedes puteus, quantumlibet hauri.*

Vrb. *Num carnes comedis? sO. non sum lupus. VR. anne Corinthi
Splendida Vasa tibi? sO. Samiis iucundius vtor.*

Vrb. *Quis coquus est? sO. ignis. VR. famulus quis? sO. nolo alere
hostem*

Ipse domi. VR. at famula saltem caruisse molestum.

Sol. *Tartareas habitat hominum aduersarius ædes.*

Vrb. *Uxorem sed habes? sO. non sic sum stultus ut Orpheus,*

Qui nigra, Eurydicen rapturus, limina adiuit.

Vrb. *Cur pulchras adeo & populosas deseris Vrbes?*

Sol. *Cur Vrbes linguam? curas & tædia linquo;*

Effugio & scelerum Lernam, quæ semper in ipsis

Urbibus & populis regnant, & noxia menti

Multa ferunt secum, quæ vita Mönastica nescit.

Vrb. *Viuiorum interea spernens consortia, quare*

In defunctorum scriptis tam sedulus hæres?

Sol. *Quod minimum à viuis verbo exemploque bonorum*

Percipio, ex libris ut vix mala paucula carpo:

Sic horum assiduus lector bona plurima disco.

Vrb. *Macte animo felix, sed me discedere tempus:*

Nauta vocat, mercator adest, qui mercibus vsque

At Tanai aduectis, multa prece sæpe vocatum

Appulit in portum: viso num scænora multa

Adferat, an vanis fallit mea scrinia spebus.

Sol. *Hei quàm difficile est locupletes linquere Mundum,*

Et summa ætherei penetrare palatia regni!

MARTINVS DVNCANVS QVEMPENAS
DELPHENSIVM PASTOR IN D.
HIPPOLYTI.

QVIS sibi, quis sanus caput amputet ob cerebellum
Affectum? vel quod cecutiat alter ocellus?
Quis prudens oleum omne recuset propter amurcam?
Humanum genus omnipotens Deus haud viciorum
Labe, sed ingenij est commensis nobilitate
Se dare dignatus multo pro hoc sanguine fuso.
Vitam igitur solam non quorundam improbitate
Pensicules, rerum sed lance & pondere iusto,
(Ni damnare velis, quæ sunt sita cuncta sub astris)
Hanc quanti faciat Deus ipse vel inde patescit,
Quod solos rapuit duo Vates ad Paradisum
Solam, ubi semper agant solo cum Numine soli,
Omnibus exuti rebus mundi, & valedictis.
Impius est, genus hoc vita qui vult abolere:
Excindat potius, si quid subrepsit iniqui.
Religione stet ordo sua, cadat omne quod obsit.

L 2

COR-

CORNELII MVSII DELPHI

SACRORVM CARMINVM

SYLVVLA.

PSALMVS CXXVII.

Clarissimo Domino D. Cornelio Susio, Præsidi
Hollandiæ, eidemque Domino in Ryſvvyck,
Epithalamij vice.

BEATVS ille quisquis est,
Qui corde casto & integrè
Deum colens, rectissimas
Eius vias non deserit.
Non ille perdet improbo
Sudore quod peperit sibi;
Certò at fruetur dulcibus
Felix laborum fructibus.
Ut nexa vitis fraxino,
Latoque onusta palmite
Fætus abunde plurimos
Cultoribus fundit suis:
Sic fida coniunx, vinculo
Coniuncta firmo quæ tibi est,
Reddet domum latissimam,
Et te beabit filijs.
Qui, hortos oliuæ ut floridos
Cingunt nouella gratius
Adſabulantes ſuauiſſiter,
Menſam coronabunt tuam.

Tantum

HYMNI

26

*Tantum arbitrum ne negligas,
 Rerumque factorem omnium,
 Qui ter quater clarissimum
 Cumulabit aetheris bonis.
 Ubi te prius nepotibus
 Hic plurimis ditauerit,
 Quos tu videbis nobiles
 Mores auorum vincere.
 Tunc fas erit quiescere,
 Et pace multa perfrui,
 Quam nulla vis Tyrannica
 Turbare, nec Satan queat.*

HYMNI.

HYMNVS ANTELVCANVS.

*CE DVNT tenebrae lumini,
 Cedat malum virtutibus,
 Placemus offensum Patrem,
 Ex corde ductis lachrymis:
 Mox lucis ad crepusculum
 Rerum precemur arbitrum;
 Curis honestioribus
 Ducamus ut totam diem.
 Ut quum redit vicaria
 Nox qua quieti consulit,
 Latemur ordinaria
 Quod sic dies decurrerit.*

HYMNI

LVCANVS.

GRATESTIBI quas possumus,
Lati Deus reponimus,
Somnum quod absque noxiis
Insomniis peregrimus.

Lux emicat clarissima,
Per quam niteſcunt omnia,
Tu Chriſte terſis ſordibus,
Præſta nitorem cordibus:

Ut ſanctitati deditus,
Sanctè dies pertranſeat,
Bonis ſimul conatibus
Finis bonus reſpondeat.

SVBMERIDIANVS.

VENI benigne ſpiritus,
Emitte lumen calitus,
Et corda culpis obſita,
Scopis timoris expia.

Da gratiam petentibus,
Solatium mœrentibus,
Domitoque mortis corpore,
Nos ſpiritu fac viuere.

Vt nil loquamur quàm Deum:
Nil cogitemus quàm Deum,
Nil expetamus quàm Deum,
Nil diligamus quàm Deum.

MERIDIANVS.

VT ſol coruſco lumine,

HYMNI

*Terra capacem circulum,
 Illustrat, & vastissimam,
 Serenat aureus plagam:*

*Sic & laborum insignium,
 Lux publicè resplendeat,
 Virtus item mortalibus,
 Sic ceteris praluceat.*

*Non ut videntes laudibus
 Nos luculentis efferant,
 Sed integram quo gloriam,
 Patrem in supremum transferant.*

POMERIDIANVS.

*REBUS creatis vltimum
 Cunctis Creator terminum
 Qui ponis, & nascentia
 Semel iubes occumbere:*

*Te supplices deposcimus,
 Futura qui non nouimus,
 Audi preces, quas ocys
 Labente sole fundimus.*

*Ut quum dies vel nox venit,
 Suprema nostri temporis,
 Curis solutos gaudiis
 Nos asseras cælestibus.*

VESPERTINVS.

*HORAS dièi lucidus
 Caligo pellit irruens,*

Dies

HYMNI

*Dies amarus occidit,
Nox inuicem tristis redit:
Sic conditor, sic cognitor
Rerum vicissitudines
Disponis, & iubes sua
Opus quieti cedere.*

*Te nos alacres, quæsumus,
Ut noctis à somno breui
Reddas resumptis viribus
Felicibus laboribus.*

NOCTURNVS.

*VIGILATE Christi milites,
Et arma lucis sumite,
Non hac soporem tempora,
Sed dura poscunt pralia.*

*Satan furens obambulat,
Et despicit quem deuoret;
Cautè cui resistite
Immobili fortes fide.*

*Estote pulchrè sobrij,
Orate semper seduli,
Durate: post certamina
Celi sequetur gloria.*

FUGIENDVM IMPROBORVM HOMINVM
CONSORTIVM.

AD Iacobum Sanctaragundum.

Si vides hæc qua ratione scribo
(Non enim paruis Iacobe causis
Ducor, ut cui sit tua vita iuxta
Ac mea cura)

Non seres agrè, puto, si monebo
Pauca, quæ toto (neque fallar) ævo
Proderunt seruata tibi, mihi que
Scripta placebunt.

Vidimus multos vitiiis sepultos
Tandem amicorum monitis reuixit,
Qua nisi audissent, vel adhuc malorum in
Face iacerent.

Non nigro quòd sis scelere inquinatus
Hactenus, sed ne vitare, mollis
Prurit hinc quando caro, quumque Damon
Hinc vaser urget.

Quumque corrupti socij suos te
Callidè in mores trahere adlaborent,
Hucque te Bacchi, velit hic Diones
Esse clientem.

Sponte nos omne in vitium mouemur,
Nulli ut accedant scelerum magistri,
Desipit quicumque oleum flagranti
Adiicit igni.

HYMNI.

Natum nilest magis ac sodales

Improbi, multi hoc pereunt veneno:

Hos fuge, aut seris senior querelis;

Multa dolebis.

Ut qui equum amisit, nimis ille sero

Doctus, occluso stabulo ingemiscit:

Frustra & ereptum lachrymis puella

Quærit honorem.

Non es è duro rigidus metallo,

Rege nec magno es Solomone maior.

Crede, perfectis etiam nocent con-

sortia praua.

Nemini tutum est colubros fouere,

Nec pedem illasum facile est referre,

Asperas sentes, tribulosque acutos

Inter euntem.

Quis picem certa sine labe tangit?

Quis sinu flammam gerit haud adusta

Veste? vel saluo pede quis valebit

Tangere prunas?

Qui periculo adstat, perit in periculo:

Unius porci scabie occidit grex:

Unaque aspecta modo putrefacta,

Putret ab una.

Quin Deus gentes habitare iuxta

Abram electos vetuit nepotes,

Iussit & nunquam socia inter ipsas

Fœdera pangant.

Nempe ne misti imbiberent prophanos
Gentium ritus, & abominandum
Discerent lignum colere, aut rogare
Marmora surda.

Tantum habet iusta rationis, atque
Interest tantum, quibus & quibus cum
Careus viuas, neque debet esse hæc
Ultima cura.

Utilis non sic regio, nec aër,
Corpori prodest adeo salubris,
Quàm parum firmis animis bonorum,
Crebrior usus.

Proinde te vitæ populis probatæ
Iunge, qui Christi faciant ministrum,
Et via angusta doceant ad altos
Scandere celos.

Negligis? certè (veteres quod aiunt,
Cum pares viuunt paribus libenter)
Esse te nequam quoque dicet orbi,
Garrula fama.

Cum malis passim malus esse reetè,
Cum bonis viuens bonus æstimatur,
Ne nihil referre putes, quid olim
Turba loquetur.

Disce quàm vita est fragilis brevisque;
Ille nunc, nunc hic moritur, die hoc tu,
Cras ego, & tandem hac ratione Leto
Dedimur omnes.

HYMNI.

*Haud secus quàm si lanius modò illas,
Has modò educat pecudes, ouile,
Omnibus donec semel interemptis,*

Reddat inane.

*Nec tibi tanti Priami superba
Regia, aut Cræsi fuerint fluenta
Aurea, ut mutare velis caducis*

Sidera rebus.

*Nempe quid vastus tibi prosit orbis,
Ultimis à Gadibus usque ad Indos,
Si tua aternos anima heu misella*

Ibit in ignes?

AD CHRISTVM PASSVM

CONFESSIO.

Ad te reuertor optime,

O Christe tu me suscipe,

Si suscipis ne desere,

Ad te reuertor ô pie.

Pudet quod ista vulnèra,

Spècto & coronam spineam,

Causâque quod video meâ,

Tam dira te passum malâ.

Ego ista fodi vulnèra,

Ego coronam hanc in sacrum

Crudelîs impressi caput,

Ego coëgi te in cruce.

Sed quanta quanta charitas!

Et quæ

*Et quæ tua est clementia
Peccavi ego, tu debita
Pro me necis pœnam luis.*

*Hostis fui, tu filium
Me per crucem facis tuam:
Seruus fui, tu liberum
Cruore me asseris tuo.*

*Age quid tua pro gratia
Tanta rependet Musius,
Inops miserque Musius,
Peccator vsque pertinax?*

*Qui nil boni ingratus facit,
Indignus affatu tuo,
Indignus aspectu tuo,
Indignus hanc terram vt terat.*

*O si semel concesseris,
Amore vt ardeam tui,
Vitam lubens tum impendero
(Nam cuncta debeo) tibi.*

AD CHRISTVM CRVCIFIXVM
LACHRYMAE.

*Quis lachrymarum perpeti
Rigabit ora flumine,
Nocte vt fleam, luce vt fleam,
Tam grande & indignum nefas,
Quodque impius feci malum,
Infandum, inauditum malum.*

HYMNI.

Tu tu innocens pendes cruce hac,
 O Christe, culpa ista est mea,
 Debebam ego hac opprobria,
 Crucemque in re noxios
 Inter latrones perpeti,
 Nisi charitas faceret tua.

Quis lachrymarum perpeti
 Rigabit ora flumine,
 Nocte ut fleam, luce ut fleam,
 Tam grande & indignum nefas,
 Quodque impius feci malum,
 Infandum inauditum malum?

AD EVNDEM
 CVLPÆ DEPRECATIO.

TE ne innocentem promea,
 O Christe, culpa tam graue
 Opprobrium crucis pati?
 Agnosco culpam gratiam,
 (Quod proprium semper tibi)
 Culpam satenti ne neges:
 Hoc Musius Cornelius,
 Supplex tuus Cornelius,
 Prostratus ad tuos pedes.
 Crucis per indignam necem,
 Te obsecro, culpam ne imputa,
 Sed tolle quicquid est mali.

AD CHRISTVM REDEMPTQREM.

TANDEM *Redemptor inferos**Adis, tuosque tetricis**Populos tenebris abditos**Reddis sereno lumini,**Camposque ad Elysios vocas.**Id quod Patrum fecit fides,**Virtusque, & ingens gratia,**Tua singularis gratia,**Qua gratis ingratissimum**Complecteris nostrum genus.*

AD CHRISTVM RESVRGENTEM.

RESVRGE *Victor Tartari,**Domitorque demonum potens,**Resurge Christe, nempe enim**Sic spem resurgendi quoque**Credientibus certam facis.**Et quid vel improbissimus,**Profit labor mortalibus,**Nisi vita posthac altera,**Meliorque restet mortuis,**Tantisque defunctis malis?*

AD VIRGINEM MATREM SVB SA-

CROSANCTAM COMMVNIO-

NEM SVPLICATIO PRON.

AD *sacram esuriens quoties accedo Synaxim,**Indignus cassa pellere glande famem,*

Hei

HYMNI.

Hei quantum timeo, quàm exhorreo, quamque tremisco,
 Discutiens qualem sumere posco cibum!
 Quem tamen ut summum munus venerorque, coloque
 Indignum ast minimo munere me video.
 Peccatis adeò supremo à vertice, ad imos
 Usque pedes scateo, computreoque miser:
 Nec scio qua dignus fiam ratione, modoque,
 Tu nisi pro indigno Virgo parensque roges.
 Tu Regina poli, paradisi porta vocaris:
 Atque beatorum spirituum Domina,
 Confugium miseris, sacra anchora, portus, asylum
 Mater & alma Dei, filia & alma Dei:
 Cui Pater & talis Natus non vlla negabit,
 Et si etiam fuerint ardua vota nimis.
 Ad te igitur fidens venio ter maxima Diva:
 Auxilium & supplex subsidiumque peto.
 Ut dignè valeam caelestem frangere panem,
 Atque meo fructum corde fouere tuum.
 Sum sanè indignus (fateor semperque fatebor)
 Ut donis potiar muneribusque sacris.
 Tu benedicta tamen super omnes Virgo puellas,
 Digna habita es summum gignere sola Deum.
 Te mediatricem tantum, sistasque patronam:
 Et fiam dignus qui malè dignus eram.
 Nam licet offendi numeroso crimine Natum,
 Inferni pœnas commeruique graues,
 Tu Natum placare potes, tu flectere Natum,

Quem

Quem prouum & precibus scis facilem est tuis.
 Heu me infelicem, si sacro corpore Nati,
 Et sacro Nati sanguine destituor.
 Aut si non dignè sacram delibo Synaxim,
 Iudicium comedens, iudicium quæ bibens.
 Quod mihi si irato contingat numine, nunquàm
 Vixisse præstet, vel periisse statim.
 At sperem per te meliora, o candida Virgo,
 Si natum expositum, si placidumquæ dabis.
 Si satages durus ne quid mihi scrupulus obsit,
 Quod sacra hæc nulli est mensa parata cani.
 Sum canis indignus prorsum, cur vera tacebo?
 Sum canis infidus, mutus, ineptus, iners.
 Verùm non totum quero consumere panem,
 Una mihi fuerit paruula mica satis.
 Nec totum quero sitiens absumere vinum,
 Vna satis fuerit gutta rubella mihi.
 Hanc Natus saltem, Mater, ne deneget ora:
 Ne pereamquæ siti, ne pereamquæ fame.
 Et quantum hoc. Nato est seu magnum seu dare paruum:
 Omnia qui verbo condit alitquæ potens?
 Sed iuuat indignum multum me & sæpe fateri,
 Si fortè indignos Natus amare velit.
 Qui non indignum frustra descendit in orbem,
 Nec solum dignas querere venit oues:
 Sed magis indignis se peccatoribus esse
 Missum, veriloquo protulit ore suo.

Qualis ego imprimis, so mmo corruptus inertis,
Et mundi blandis perditus illecebris:
Qui si quando vocer clementi à numine, iussus
Illice de lecto surgere continuo,
Sponte ob surdesco plumasque relinquere sperno,
Affixus vitius sicut hi rudo meis.
Peccatum longa namque assuetudine traxi,
Funiculi ut plaustrum loraque densa trahunt.
Unde adeo feruens letalia crimina se utor,
Perpetuo & sordes sic amo, sic iter o:
Ut cupidè vomitum repetit canis atque resorbet,
Utque volutabrum sus amat vda suum.
Sæpe etiam memini me sic peccata bibisse,
Ut si quis gelidam potet anhelus aquam..
Hactenus hoc, dolor, inuerso vita ordine ducta est,
Et mala sunt multis accumulata malis.
Quin etiam à tergo pulchra virtute relicta,
Sic tota in vitis vita peracta mihi est;
Ac si aquus vindex nullus iudexue supersit,
Qui pœnas reddat suppliciumque reis.
Illorum sed enim scelerum veterumque malorum,
Ex animo tandem penitet atque pudet.
Et quem non siliques pigeat glandesque vorasse,
Qui puro ventrem pane replere queat?
Sic tamen assueto, Mater, vitiusque ligato,
Quæ mihi surgendi spes reliqua esse potest:
Vincula ni fortis durissima soluere Natus,

Pecca-

Peccati & nodos explicuisse velit.
Ipse etenim est cunctis spes certa & sola misellis,
Ipse est conuersis gloria, vita, salus.
Ipse homines propter castam est delapsus in aluum,
Teque est perpetua ex Virgine factus homo.
Ergo ibo ad Natum, placidum Natum, atque benignum;
Procumbam & sanctos illius ante pedes.
Dicam me grauiter, dicam peccasse frequenter
In cælum, inque omnes clamque palamque homines.
Imo te orabo Mater, si fortè recuset,
Aspicere hunc vetulum putidulumque canem:
Ut tu interuenias pro me, gratissima semper,
Natum siue velis siue rogare Patrem.
Et peccatorem (quo non insignior alter)
Insinues votis concilisque tuis.
Quo liber vitis omni a crimine purus,
Et Nato gratus, gratus & usque tibi
Utiliter viuum possim depascere corpus,
Et vino ipsius sanguine rite frui.
Quod mihi si faueat Natus præstetque benignè,
Semper sique velit dexter adesse mihi:
O Maria o Virgo Mater, vetera omnia pono,
Atque homo purgato pectore fio nonus.

AD EANDEM VIRGINEM ET MATREM,
A SACROSANCTA COMMVNIONE,
GRATIARVM ACTIO, PRO EODEM.

GRATIA magna tibi Virgo, charissima Virgo,
Per, mihi, quam misero gratia magna data est.
Indignus fueram mysteria sacra videre,
Tu facis ut videam, tu facis ut que fruam.
Quàm tu grata Deo, quàm tu mihi Virgo benigna es!
Quae plus impetras quàm petere ausus eram.
Hoc fuit in votis, ut micam panis, & unam
Ut vini guttam parciter acciperem.
Sed largus toto Natus me corpore paui,
Et toto impleuit sanguine, Virgo Parens.
Quàm bene credideram quòd nil tibi Filius vnquàm
Denegat! & precibus quod fauet vsque tuis!
Quo magis audebo te iterum multumque precari,
Ut facilem Natum denuo sollicites.
Illius ut gustum panis, & vini que saporem,
Assiduum faciat perpetuumque mihi.
Sic etenim fiet, ne vnquàm gustare libescat
Culparum inspidas letiferasque dapes.
Sic quàm diuinum sapiet nil, nilque placebit,
Deliciasque sacras præter amabo nihil.

Q TIVM

OTIVM FVGIENDVM.

AD Balduinum suum.

OTIO qui se dederint inertī,
Nec bonis mentem studiis honestant
Semper, ignauum fugiente pectus,
Laude carebunt.

Non pigri sunt asini celebres,
Laurea & non desidibus corona
Vlla contingit, decus à labore,
Surgit honosque.

Hinc Maro clarus, Lyricusque Flaccus,
Clarus & Flacco similis Secundus,
Qui viri, obscurum, resides fuissent,
Nomen haberent.

Herculem quæ res alia axe dignum,
Quàm labor fecit? caput at quid orbis
Perdidit, magnam vitiosa præter
Otia Romam?

Namque deuictis violenter Aphris,
Romuli pubes malè feriata,
In statim quoduis scelus, in nefasque
Solvitur omne.

Quin ferunt moles Pharios superbas
Condere hic illic solitos, vaga ut ne
Otio, in Regno bene constituto,
Turba periret.

Quod velim exemplum quoque Christianos,

HYMNI.

*Haud secus quàm si lanius modò illas,
Has modò educat pecudes, ouile,
Omnibus donec semel interemptis,
Reddat inane.*

*Nec tibi tanti Priami superba
Regia, aut Crasi fuerint fluentia
Aurea, ut mutare velis caducis
Sidera rebus.*

*Nempe quid vastus tibi prosit orbis,
Ultimis à Gadibus usque ad Indos,
Si tua aternos anima hei misella
Ibit in ignes?*

AD CHRISTVM PASSVM
CONFESSIO.

*Ad te reuertor optime,
O Christe tu me suscipe,
Si suscipis ne desere,
Ad te reuertor ô pie.*

*Pudet quod ista vulnèra,
Specto & coronam spineam,
Causaque quod video meâ,
Tam dira te passum malâ.*

*Ego ista fodi vulnèra,
Ego coronam hanc in sacrum
Cruclis impressi caput,
Ego coëgi te in crucem.*

Sed quanta quanta charitas!

Et qua

*Et quæ tua est clementia!
Peccaui ego, tu debita
Pro me necis pœnam luis.*

*Hostis fui, tu filium
Me per crucem facis tuam:
Seruus fui, tu liberum
Cruore me asseris tuo.*

*Age quid tua pro gratia
Tanta rependet Musius,
Inops miserque Musius,
Peccator usque pertinax?*

*Qui nil boni ingratus facit,
Indignus affatu tuo,
Indignus aspectu tuo,
Indignus hanc terram vt terat.*

*O si semel concesseris,
Amore vt ardeam tui,
Vitam lubens tum impendero
(Nam cuncta debeo) tibi.*

AD CHRISTVM CRVCIFIXVM

LACHRYMAE.

*Quis lachrymarum perpeti
Rigabit ora flumine,
Nocte vt fleam, luce vt fleam,
Tam grande & indignum nefas,
Quodque impius feci malum,
Infandum, inauditum malum.*

HYMNI.

Tu tu innocens pendes cruce hæc,
 O Christe, culpa ista est mea,
 Debebam ego hæc opprobria,
 Crucemque iure noxios
 Inter latrones perpeti,
 Nisi charitas faceret tua.

Quis lachrymarum perpeti
 Rigabit ora flumine,
 Nocte ut fleam, luce ut fleam,
 Tam grande & indignum nefas,
 Quodque impius feci malum,
 Infandum inauditum malum?

AD EVNDEM

CULPAE DEPRECATIO.

TE ne innocentem promea,
 O Christe, culpa tam graue
 Opprobrium crucis pati?

Agnosco culpam, gratiam,
 (Quod proprium semper tibi)
 Culpam fatenti ne neges:

Hoc Musius Cornelius,
 Supplex tuus Cornelius,
 Prostratus ad tuos pedes.

Crucis per indignam necem,
 Te obsecro, culpam ne imputa,
 Sed tolle quicquid est mali.

AD CHRISTVM REDEMPTQREM.

TANDEM *Redemptor inferos**Adis, tuosque tetricis**Populos tenebris abditos**Reddis sereno lumini,**Camposque ad Elysios vocas.**Id quod Patrum fecit fides;**Virtusque, & ingens gratia,**Tua singularis gratia,**Qua gratis ingratiſſimum**Complecteris nostrum genus.*

AD CHRISTVM RESVRGENTEM.

RESVRGE victor Tartari,

*Domitorque demonum potens,**Resurge Christe, nempe enim**Sic spem resurgendi quoque**Credientibus certam facis.**Et quid vel improbiſſimus,**Proſit labor mortalibus,**Nisi vita poſthac altera,**Meliorque reſſet mortuis,**Tantiſque deſunctis malis?*

AD VIRGINEM MATREM SVB SA-

CROSANCTAM COMMVNIO-

NEM SVPPPLICATIONE PRO N.

AD *sacram eſuriens quoties accedo Synaxim,**Indignus caſſa pellere glande famem,*

HYMNI.

Hei quantum timeo, quàm exhorreo, quàmque tremisco,
 Discutiens qualem sumere posco cibum!
 Quem tamen ut summum munus venerorque, coloque
 Indignum ast minimo munere me video.
 Peccatis adeò supremo à vertice, ad imos
 Usque pedes scateo, computreoque miser:
 Nec scio qua dignus fiam ratione, modoque,
 Tu nisi pro indigno Virgo parensque roges.
 Tu Regina poli, paradisi porta vocaris:
 Atque beatorum spirituum Domina,
 Confugium miseris, sacra anchora, portus, asylum
 Mater & alma Dei, filia & alma Dei:
 Cui Pater & talis Natus non vlla negabit,
 Et si etiam fuerint ardua vota nimis.
 Ad te igitur fidens venio ter maxima Diva:
 Auxilium & supplex subsidiumque peto.
 Ut dignè valeam caestem frangere panem,
 Atque meo fructum corde fouere tuum.
 Sum sanè indignus (fateor semperque fatebor)
 Ut donis potiar muneribusque sacris.
 Tu benedicta tamen super omnes Virgo puellas,
 Digna habita es summum gignere sola Deum.
 Te mediatricem tantum, sistasque patronam:
 Et fiam dignus qui malè dignus eram.
 Nam licet offendi numeroso crimine Natum,
 Inferni pœnas commeruique graues,
 Tu Natum placare potes, tu flectere Natum,

Quem

Quem prouum & precibus scis facilem est tuis.
 Heu me infelicem, si sacro corpore Nati,
 Et sacro Nati sanguine destituor.
 Aut si non dignè sacram delibo Synaxim,
 Iudicium comedens, iudicium quæ bibens.
 Quod mihi si irato contingat numine, nunquam
 Vixisse præstet, vel periisse statim.
 At sperem per te meliora, o candida Virgo,
 Si natum expositum, si placidum quæ dabis.
 Si satages durus ne quid mihi scrupulus obsit,
 Quod sacra hæc nulli est mensa parata cani.
 Sum canis indignus prorsum, cur vera tacebo?
 Sum canis infidus, mutus, ineptus, iners.
 Verum non totum quero consumere panem,
 Vna mihi fuerit paruula mica satis.
 Nec totum quero sitiens absumere vinum,
 Vna satis fuerit gutta rubella mihi.
 Hanc Natus saltem, Mater, ne deneget ora:
 Ne peream quæ siti, ne peream quæ fame.
 Et quantum hoc. Nato est seu magnum seu dare paruum:
 Omnia qui verbo condit alit quæ potens?
 Sed iuuat indignum multum me & sape fateri,
 Si fortè indignos Natus amare velit.
 Qui non indignum frustra descendit in orbem,
 Nec solum dignas querere venit oues:
 Sed magis indignis se peccatoribus esse
 Missum, veriloquo protulit ore suo.

Qualis ego imprimis, somno corruptus inertis,
Et mundi blandis perditus illecebris:
Qui si quando vocer clementi à numine, iussus
Illice de lecto surgere continuo,
Sponte obsurdesco plumasque relinquere sperno,
Affixus vitiis sicut hirudo meis.
Peccatum longa namque assuetudine traxi,
Funiculi ut plaustrum loraque densa trahunt.
Unde adeo feruens letalia crimina sector,
Perpetuo & sordes sic amo, sic itero:
Ut cupide vomitum repetit canis atque resorbet,
Utque volutabrum sus amat vda suum.
Sæpe etiam memini me sic peccata bibisse,
Ut si quis gelidam potet anhelus aquam..
Hactenus hoc, dolor, inuerso vita ordine ducta est,
Et mala sunt multis accumulata malis.
Quin etiam à tergo pulchra virtute relicta,
Sic tota in vitiis vita peracta mihi est,
Ac si equus vindex nullus iudexue supersit,
Qui penas reddat suppliciumque reis.
Florum sed enim scelerum veterumque malorum,
Ex animo tandem panitet atque pudet.
Et quem non siliquas pigeat glandesque vorasse,
Qui puro ventrem pane replere queat?
Sic tamen assueto, Mater, vitiisque ligato,
Quæ mihi surgendi spes reliqua esse potest:
Vincula ni fortis durissima soluere Natus,

Pecca-

Peccati & nodos explicuisse velit.
Ipse etenim est cunctis spes certa & sola misellis,
Ipse est conuersis gloria, vita, salus.
Ipse homines propter castam est delapsus in alium,
Teque est perpetua ex Virgine factus homo.
Ergo ibo ad Natum, placidum Natum, atque benignum;
Procumbam & sanctos illius ante pedes.
Dicam me grauiter, dicam peccasse frequenter
In calum, inque omnes clamque palamque homines.
Imo te orabo Mater, si fortè recuset,
Aspicere hunc vetulum putidulumque canem:
Ut tu interuenias pro me, gratissima semper,
Natum siue velis siue rogare Patrem.
Et peccatorem (quo non insignior alter)
Insinues votis conciliesque tuis.
Quo liber vitiiis omni que a crimine purus,
Et Nato gratus, gratus & usque tibi
Utiliter viuum possim depascere corpus,
Et vino ipsius sanguine rite frui.
Quod mihi si fauceat Natus praestetque benignè,
Semper si que velit dexter adesse mihi:
O Maria o Virgo Mater, vetera omnia pono,
Atque homo purgato pectore fio nonus.

N 2

AD

AD EANDEM VIRGINEM ET MATREM,
A SACRÒ SANCTA COMMVNIONE,
GRATIARVM ACTIO, PRQEODEM.

GRATIAMagna tibi Virgo, charissima Virgo,
Per, mihi, quam misero gratia magna data est.
Indignus fueram mysteria sacra videre,
Tu facis vt videam, tu facis vtque fruar.
Quàm tu grata Deo, quàm tu mihi Virgo benigna es!
Qua plus impetras quàm petere ausus eram.
Hoc fuit in votis, vt micam panis, & unam
Ut vini guttam parciter acciperem.
Sed largus toto Natus me corpore pavit,
Et toto impleuit sanguine, Virgo Parens.
Quàm bene credideram quòd nil tibi Filius vnquam
Denegat! & precibus quod fauet vsque tuis!
Quo magis audebo te iterum multumque precari,
Ut facilem Natum denuo sollicites.
Illius vt gustum panis, & vini que saporem,
Assiduum faciat perpetuumque mihi.
Sic etenim fiet, ne vnquam gustare libescat.
Culparum insipidas letiferasque dapes.
Sic quàm diuinum sapiet nil, nilque placebit,
Deliciasque sacras præter amabo nihil.

OTIVM

OTIVM FUGIENDVM.

AD Balduinum suum.

OTIO qui se dederint inertī,
 Nec bonis mentem studiis honestant
 Semper, ignauum fugiente pectus,
 Laude carebunt.

Non pigri sunt asini celebres,
 Laureæ & non desidiis corona
 Ulla contingit, decus à labore,
 Surgit honorque.

Hinc Maro clarus, Lyricusque Flaccus,
 Clarus & Flacco similis Secundus,
 Qui viri, obscurum, resides fuissent,
 Nomen haberent.

Herculem quæ res alia axe dignum,
 Quàm labor fecit? caput at quid orbis
 Perdidit, magnam vitiosa præter
 Otia Romam?

Namque deuictis violenter Aphris,
 Romuli pubes malè feriatâ,
 In statim quoduis scelus, in nefasque
 Soluitur omne.

Quin ferunt moles Pharios superbas
 Condere hic illic solitos, vaga ut ne
 Otio, in Regno bene constituto,
 Turba periret.

Quod velim exemplum quoque Christianos,

Tam sequi nostros, mihi quàm videtur,
Publicis illud fore perdecorum, &
Vtile rebus.

Non vt altas Pyramides (quod illi)
Commodas nulli, Rhodium aut Colossus,
Perdita impensa fabricentur, atque ad
Sidera ducant.

Templa sed sacris populo audiendis,
Et scholas condant pueris docendis,
Strenuè aut Vallis ruitura densis,
Oppida firment.

Nempe sic fiet facile vt ne egenus
Ciuum quisquam siet, vtque nemo
Sordido sese temere otiosus
Crimine foedet.

Nam quid in molles Sodomos amores
Improbos traxit, nisi segne mentis
O tium, & nullos manus assüeta
Ferre labores.

Attalum regem diuturna pax &
Otium fregit, hominemque obesum
Alteri iussit onus imperique
Cedere sceptrum.

Otium certè mala multa gignit,
Otium nutrit Venerem aleamque,
Otium robur minuit Virumque ef-
feminat artus.

Dum

Dum virent ergo tibi crura Balde,
 Dum cales, velis & equis (vt aiunt)
 Otium fontem fugies malorum,
 Consule amico.

Teque Formicis ducibus labori
 Gnauus accinges, ad Apumque morem,
 Non fines multa sine fruge vt vna
 Effluat hora.

Hoc enim in primis opus est volenti
 Scandere excelsa auricoma Minerua
 Templa, & optanti celebres per vrbes
 Nobile nomen.

QVID ETIAM IN VERO DOMINICAE
 CRVCIS LIGNO ADORANDVM SIT.

Qui venerabundus lignum Vitale salutas,
 Credis & hanc veram particulam esse Crucis:
 Mitte novos hostes vulgi, & si quis fuit error,
 Concepta hic quoties fundere vota paras.
 Nec supplex, lignum, lecta licet arbore natum,
 Ceu summum summo numen honore colas:
 Sed ligno affixum quondam prostratus adora,
 Sintque huc intenti mens oculique tui.
 Sic animi demum vota impetrabis, & ipsi
 Vtiliter figes oscula pura Cruci.

AD

AD ILLVSTRISSIMVM PRINCIPEM

D. Maximilianum a Borgundia, Marchionem Veriensem &c.

VITA BEATA.

VERE quæ faciunt virum beatum

Matth. 5

(Christo credere si magis velimus,
Illis quàm nimis ethnicis Poëtis)
Illustrissime Maxmiane sunt hæc:
Mens non ambitiosa, sed modesta,
Nec fracta improbitatibus malorum,
Admissi sceleris dolor perennis,
Ardens esuries sitisque recti,
Fratris commiseratio indigentis,
Cordis mundicies, cupido Pacis,
Propter iustitiam pati libenter.

REVERENDISSIMO IN CHRISTO

Patriac D.D.VVilhelmo Lindano, Episcopo
Ruremundensi.

ALMAE cui Concordia

Psalmus dicabitur? tibi
Lindane Prasul optime,
Qui Charitatis candida,
Cultor que pacis sedulus,
(Veri quod est Antistitis)
Nihil prius Concordia,
Nil pace pulchrius putas.

PSALMVSC XXXIII.

O QVAM bona est pax! musua
 Quàm dulcis ipsa Charitas!
 Non balsamum suavius,
 Spirauit electissimum,
 Quando ille Aaron ungitur,
 Pedes ad vsque à vertice.

Nec utilis ros est magis,
 Qui Hermonis cadens iugis,
 Agros Sionis aridos,
 Rigat facitque fertiles.

Nempe hic vbi Concordia est,
 Vbi viget dilectio,
 Ibi Pater ditissimam
 Fundet bonorum copiam,
 Vitamque perpetem dabit.

EXIMIO S. THEOLOGIAE PROFES-

sori, eidemque Decano Louaniensi D. Ruaro
 Tapperio Enchusiano.

S I quæris quid agam rei Ruarde,
 Ingens Θεολογῶν decus Ruarde,
 En qui simpliciter tibi loquetur,
 Psalmus Hexametris nouis ligatus,
 Ire qui pede libero solebat,
 Et (quod fortè magis nouum videtur)
 Qui vincētus quoque nunc abire gessit,
 Et lucem tenebras perosus optat,

Nil Ungues metuens seueriorum,
Si esset iudicio prius probatus,
Et pulchrè saperet tuo palato,
Non quòd sic meritis putabit amplis,
Et fecisse tuo satis fauori,
Immenso nimium tuo fauori,
Si prodit propriè tibi dicatus;
Sed tui memorem cupit, suoque
Pro gratum modulo docere Delphum,
Qui quodcunque potest libenter offert:
Nam quamuis habitem procul remotus
A te magnifico meo Patrono,
Usque & usque tamen tui recordor,
Obseruoque coloque diligoque:
Sat felix studium piæ Mineræ,
Pio si poterit viro placere..

PSALMVS CXLV..

QUI cursus celi, terraque immobile pondus,
Et mare fluctuagum, genus inque iis omne animantum,
Pro nut u iussuque tuo Rex maxime regum,
Ac immenso Deus moderaris, continuè te,
Te dicam, te laude veham, nomenque decusque,
Non hodie tantum, nec dum lux altera surget:
Verum perpetuo quod nunquam finiet æuo,
Et seclis cunctis, & si quid tenditur ultra,
Cantibus integro promptis ex pectore tollam.
Omnia magnarum Dominus præconia rerum.

Optimus exuperat, neque enim ter maximus ullum
 Suscipit ille modum, sed quantum extenditur orbis,
 Inter & occasus Phææos inter & ortus,
 Ultima seu cæli quantum sua brachia tendunt,
 Tantum ille immensus complectitur, occupat, ambit,
 Et tantum latè imperitans dominansque gubernat:
 Hactenus ut nemo fuerit, nemoque futuro
 Tempore tantus erit, qui vestigare valebit,
 Aut infinitum poterit comprehendere numen.
 At genus omne hominum tua facta amplissima dicet,
 Atque in perpetuas operum præclara tuorum,
 Progenies signa extendet, viresque potentes
 In vulgus populosque palam gens altera sparget:
 Quin & magnificos ego Maiestatis honores,
 Et res insignes memorandaque sedulus acta,
 Omnibus in templis, domibus, plateisque, theatrisque
 Eloquar, & nunquam miracula tanta silebo.
 Tu mihi principium, si quid faciamque loquarque,
 Tu medium, tu finis eris, tu semper in ore
 Inque oculis semper, semperque in corde manebis,
 Hærebisque meo: tua sancta in limine pingam
 Gesta domus, in fronte geram, quacunque iubebis,
 In manibusque meis, nulla ut me obluio recti,
 Vel brevis inuadat: verum fortuna secunda,
 Siue aduersa mihi obtigerit, gratissimus usque
 Præstabo, & memori benefacta insignia mente
 Enumerans, semper grates laudesque decenter

Decantabo tuas, donec spirare licebit.

Utque aliis alijunctissima robora narrent,
Tu quibus & reges terres & diruis vrbes,
Augustos omnes titulos, variosque triumphos
Ipse tuos scriptis ad postera secula mittam:
Nimirum summi vires ut numinis amplius
Spectantes, plenius celebrent tua nomina labris,
Iustitiamque tuam modulato pectine cantent.
Est clemens plane Dominus, planeque benignus,
Longanimis, patiens, & iustam lentus ad iram,
Utque malo ignoscat mirè propensus in omnes.

An non ipsius bonitas per cuncta suorum ex-
empla operum clare in dictis factisque relucet?
Hinc omnes opera illa canent, imo Undique passim,
Præcipue sancti, quibus est tua gloria cura,
Te Dominum agnoscent, & grato carmine psallent:
Et quod magnificè regnas, quodque æthera solus
Feceris & terras, sublata voce loquentur:
Nec temere id facient, verùm ut lauderis vbique,
Atque ut posteritas omnis cognoscat Adæa,
Omnipotens quod sis terra & regnator Olympi.

Regna humana cadunt, pereunt reges populi que,
At regnum imperiumque tuum durabit in ævum,
Stabit & æternum nulli violanda potestas.
Nutantes fulcit Dominus, lapsosque potenter
Erigit, & recto depressos corpore sistit.
Omnes in te oculos conuertunt, atque cibum te:

Quisque

Quisque suum, certo quem præbes tempore, poscunt:
 Tu siquidem dextram apperrens animalia diues
 Omnia, seu terræ habitent seu flumine viuant,
 Seu per inane volent & pulsant verberare calum,
 Respicias obseruans, & victu pascis abunde.
 Omnibus in rebus Dominus verbisque visque,
 Est æquus, sanctæque facit, iustumque tuetur,
 Annuit & votis fido de pectore fufis,
 Et desiderium fuerit quodcunque piorum,
 (Qui vel ritè petunt, vel qui constanter adorant)
 Audit, & adimplet subito, certanque salutem
 Exhibet, & nullis permittit rebus egere:
 Adde & sollicitè quòd se tueatur amantes.

Sed veluti stipulas turbo impetuofus inanes
 Tollit, & ad tenues compellit fulminis auras;
 Sic Deus iratus cunctos subuertet iniquos,
 Iustitiæque inopes æternum trudet in ignem,
 Nulla ubi spes, habitant & ubi solatia nulla,
 Nulla quies, semper gemitus, semperque dolores.

Grato ergo ore loquar Dominum noctuque diuque,
 Quandoquidem & iustum est, ut quicquid viuit vbiuis,
 In Domino fidat, sanctumque & amabile nomen
 Illius æternum, vel si quid longius usquàm est,
 Prædicet, & toto memorandum reddat in orbe.

IN D. VVILLIBRORDVM ARCHIE-
PISCOPVM TRAIECTENSEM,
HYMNVS.

REVERENDISSIMO IN CHRISTO

Patri ac D.D. Antonio Houac, Monasterij D.VVillibror-
di Heptinaccienfis Abbati, Sacriq̃ue Imperij Principi;

GRATVLATIONIS ERGO.

TE VVillibrordum Præsulem

Adeoq̃ue nostrum Apostolum,
Cantamus hymnis Symmetris
Et spiritalibus modis.

Tu sanguinis prosapie,
Pia licet, renuntians,
Procul omnium consortio,
In Solitudinem migras.

Hic viuis integerrimè
Iustè, pieq̃ue & sobriè,
Hic liberè colis Deum,
Securus à contagiis.

Sed euocatus calitus,
Ad præsulatus ordinem,
Iusto talenti pro modo,
Multa vt referres sænora.

Verbi sacri fidem sacram
Tu tradidisti gentibus,
Et primus hic lectissimos
Christo parasti milites.

*At nunc dolor, quàm plurimi
Tua abnegantes dogmata,
Labuntur à prisca fide,
In Heresis delirium.*

*Quam VVillibrorde feruido
Nisi precatu sopias,
Actum tua de Frisia,
Actumque de Batavia est.*

*Quod ne accidat, te sedulis,
Qui firmi adhuc consistimus,
Votis rogamus, optime,
O Præsulò Apostole.*

IN D. AGATHAM VIRGINEM ET

Martyrem Cantuuncula quædam similis illi cuius
initium, Lauda Sion Salvatorem &c.

*CELEBREMVS sapientis
Cataneæ & prudentis,
Virginis victoriam:*

*Quæ crudelis Quintiani,
Præsidis Siciliani,
Domuit ferociam.*

*Hic in Bonam deperibat,
Et tantum non insanibat,
Propter formæ gratiam:*

*Et ne voto frustraretur,
Sed vt certo potiretur,
Vocat Aphrodisiam.*

Lena veriis tenellam
Artibus tentat puellam,
Inexpertam scilicet:

Jam ex passis velis adoritur,
Iam contractis cauta aggreditur,
Ut fallat videlicet.

Postquam suas egit partes,
Post consumptas omnes artes,
Nil mouit immobilem.

Prius cautes conteras,
Quam in petra transferas
Christianam stabilem.

Mens enim fide fundata,
Et in Christo solidata,
Nulli potest cedere:

Est Tyrannus frustra ferus,
Et frustra cupit seuerus,
Deo rixam flectere.

Judex spretus ut honoret
Vult idoli: & adoret

Virgo, absurdissima:
Quod dum grauius excusat,
Et ingenuè recusat,
Minitatur vltima.

Diua minis nil turbatur,
Nec tormentis consternatur,
Sed ridens dementiam:

Ipsam

*Ipsum contra se opponit,
Et sibi constans proponit,
Numinis presentiam.*

*Si equuleos parabis,
Si mamillas amputabis,
Hilaris aspiciam:*

*Sed & flammæ imminentes,
Et leones irruentes
Haud tristis excipiam.*

*Erras autem laniando,
Si queris & concremando,
Frangere Christicolam:*

*Nam quo fortius torquebis,
Fortem magis promouebis,
Et reddes Calicolam.*

*Posthac Agathe beata,
Nova luce illustrata,
Quum multis esset probata,
Igne, ferro, verberè:*

*Se Deo supplex commendat,
Ut sponsus sponsam attendat,
Anhelamque apprehendat,
Et ducat ex carcere.*

*Christe cuncta qui finxisti,
Et me semper custodisti,
Qui constantiam dedisti,
In tanta angustia.*

Iube spiritum afflictum,

Sed infraetum & innietum,

Ad superna benedictum

Peruenire gaudia.

Vix petiuit, vix finiuit,

Ecce vidit quod cupiuit,

Non obiuit, sed abiuit,

Mens cum Superis iam uiuit

In caelesti regia.

Uderidet Quintianos,

Decios & Decianos,

In constantes Christianos

Frustra sanos & insanos,

Jubilans in gloria.

D. SIM-

D. SIMPLICIANI
MARTYRIUM.

ERGONEfando
Simplicianus
Occidit igne?
Et fora multo
Corporis vsti
Pulvere sparsit?
Qua, rogo, tanta aut
Quot mala simplex
Ille peregit:
Quod miser arcto
Guttare fumos
Hauferit atros?
Anne veneni
Pocula cuiquam
Miscuit atra?
Imo prius ter
Letifero ipse ex
Fonte bibisset.
Inuidus an quem
Insidiosa
Cade peremit?
Mitis in omnes,
Nulla malignè
Corpora tangit.
Sed male auarus

Multa alienas
Vi rapuit res.
Res cui parua
Sufficit, is nil
Amplius optat.
Ast ego rursus
Fanda nefanda
Quarere cogor.
Quod genus illa
Criminis audax
Tale patrauit;
Quod nisi solo
Debuit atrox
Igne piari?
Sceptra ne facto
Improbior
Regia lasit?
Nil opus illi
Imperio, qui
Paruit ultro.
An patria exul
Mœnia seuo
Prodidit hosti?
Pacis amator
Odit acerbè

Semina rixę.

*Impius atqui
Forte parentes
Sustulit ense.*

*Gratus utrumque
Ultima ad usque
Funera pavit.*

*Denuo clamem,
Ni prope fracta
Voce fatiger.*

*Nube ne tanta
Flagitiorum
Vixit opertus:*

*Dignus ut esset
Tam sceleratas
Pendere pœnas?*

*Quid, precor, egit
Simplicianus,
Aut quid omisit?*

*Horrida nunquid
Est Sodomorum
Stupra secutus?*

*Imo vel ipsa,
Fœda pudicus,
Nomina fugit.*

*Num simulacbris
Damoniorum*

Thure litavit?

*Non mage quisquam
Numina falsa
Horruit unquam.*

*Nunquid auita
Religionis
Dogmata spreuit?*

*Ast ea nemo
Liberiore
Protulit ore.*

*At nova forsan
Luciferorum in-
uenta probavit.*

*Illa probavit?
Quin cane peius
Odit & angue.*

*Desino tandem
Plura rogare, &
Dicere plura:*

*Quum modo causa
Tota patenter
Clara videtur.*

*Ille etenim si
Talia nunquam
Fecerit insons:*

*Hoc superest, quod
Iustus iniquis*

Ignibus

Ignibus arsit.

*Quod, puta, vera
Est pictatis
Verba professus.*

*Quodque ea constans,
Corde manuque ex-
ercuit usque.*

*Quod mala nullis,
Quod bona multis,
Plurima fecit.*

*Hoc capitale,
Hoc scelus illud,
Igne piandum.
Ergo nefando*

Simplicianus

Occidit igne?

*Et fora sacro
Corporis usque
Pulvere sparsit?*

*O bene natum,
Terque beatum
Simplicianum!*

*Qui pia propter
Dogmata Christi,
Igne crematus:*

*Æthera calcas,
Dira Tyranni
Fulmina ridens.*

IN D. VERONAM VIRGINEM, PRO STE-
PHANO CORONO VILLICQ
TILETANO.

*VERONA charior mihi
Gazis potentis Aphrice,
Vel quas Tagus vel India
Fluenta fulva continent.
Tu sola plurimas mei
Curas bibaces sanguinis,
Curas edaces pectoris,
Auertis & fugas procul.
Quod non beati Lydij,*

*Non Crassi opes nec Attali
Possint, nec herba qualibet,
Nec docta Apollinis manus.*

*O debeo quantum tibi,
Verona candidissima,
Verona verè bellula,
Verona Veronillula.*

*Sint qui febres iuxta tuum
Ponant sepulchrum torridas.
De fonte sint qui limpidò,
Scabiem bibentes abluant.*

*Multo amplius praestas mihi,
Mentis dolores anxios,
Curaeque quum tollis graues,
Et vana tot phantasmata.*

*Meam quietem enormiter
Quae nocte turbant & die,
Huiusque vitae plurima
Quae saepe gignunt tedia.*

*Sed quid tuus clientulus,
Angusti agelli Villicus,
Hoc pro rependet munere?
Quas reddet olim gratias?*

*Certè reuisset crebrius,
Quando amplius nihil queat,
Numenque tantum praedicans,
Te flore vestiet pio.*

REVERENDISSIMO IN CHRISTO

Patri ac D. D. Nicolao à Noua terra, Episcopo Harlemensi, ac Prælato Hæmundenfi.

*N E te, Harlemorum prime atque grauissime Præsul,
Præteream, hunc Psalmum dono dicoque tibi.*

*Qui Domino reddens, bona propter pascua, grates,
Si non sit numeris, est pietate grauis.*

PSALMVS XXII.

*DOMINVS me potens regit,
Diues pascit, bonus tegit,
Valeat inopia:*

Ad sunt colles herbis lati,

Ad sunt agri fruge sæti,

Adest fontis copia.

His suauiter affectus,

Et abundè his refectus,

Excolo iustitiam:

Cuius callem per angustum

Tu me Numen ducis iustum,

Tuam propter gloriam.

Vnde nec mortis tenebras,

Nec tetras Orci latebras,

Te præsentè timeo:

Trifidus insurgat Mundus,

Si tu adsis, lætabundus,

Ille susque transeo.

Tua nam virga correctrix,

Huius

Huius & vite directrix,
Vacillantem surrigit:

Sed & baculus grauatum

Fulcit, & me desperatum,

In spem firmam erigit.

Mensam mihi apparasti,

Cenam magnam adornasti,

Regiis delitiis:

Affatim qua satiatas,

Nulli cedam irritatus,

Liber ab iniuriis.

Sic exhaustos post labores,

Post multos denuum sudores,

Post aquam tristitiae:

Caput oleo vngetur,

Et os pleno proluetur

Calice letitiae.

Sic directus te regente,

Et seruatus te fauente,

Animo & corpore:

Tuam Regiam videbo,

Teque felix possidebo,

Aeterno tempore.

CICONIA DELPHICA
SIVE
Pietatis parentum in liberos typus.
AD IODOCVM HENRICVM
AEDITVVM.

CLARVM *Batauiæ oppidum,*
Quum forte Delphos, nobile,
Incendium prosterneret,
Non cana quantum proximis
Vidit vetustas seculis,
Res tunc stupenda & omnium,
Iodoce Vatum & Rhetorum,
Vulganda linguis accidit.
Nam quum domorum culmina
Turresque templorum editas,
Flammæ vorarent stridula:
Ecce hic timebat prolibus
Tenerrimis, inuestibus,
Tristis parens Ciconia:
Nec quid misella conferat
In summo opis periculo
Habebat, aerium tamen
Tectis in Heuteri arduis
Nidum petit, circumuolat,
Omnesque pertentat vias,
Nunc ore, curuo nunc pede, ex-
emisse charos impio

supra

2

Pullos

*Pullos volens incendio,
Donec piis conatibus,
Frustrata, speque perdita,
Se sponte in ignem coniicit,
Cum dulcibus natis suis,
Malens honestè commori,
Quàm non pia esse & vivere.
Jam Græcia sit vel Italia,
Sic qua in parentes est pia,
Hæc Delphica est Ciconia.*

CICONIA PEREGRINA

SIVE

Pictatis liberorum in parentes typus.

AD LAMBERTVM GVILIELMVM

MVM PASTOREM.

INSIGNITER quondam pia

*Mater suos Ciconia
Pullos tenellos educat,
Curat, fouetque sedulo.
Idem sibi expectans seni,
Ac destituta viribus,
A prole grandiuscula,
Dulce inuicem solatium.
Nec fallitur spebus suis,
Nam membra proles languida,
Parentis ecce debilis,
Suis lacertis sustinet,*

Atque

Atque ore porrigit cibos.

Romana an hæc Ciconia,
Lamberte, sit vel Attica,
Peritiores disputent.

Nobis satis superque sit,
Cuias ea ipsa cumque sit,
Quòd impotenti & indiga
Matri rependerit Vices.

Ne Christianos interim
Typo sacrato commonens,

Ut gratias parentibus,
Pro tot piis laboribus,

Ne negligamus reddere:

Nam turpe sanè & impium,
Effet Deo simillimos,
A bestiis volucribus
Virtute prima vincier.

RADIX VITIORVM.

S I Deus in nobis, Scriptura ut mystica dicit,

Veraque ut constat, certificaque fide:

Quur ipsum minimè sentimus? multa quòd eius

Est pudor, in nobis gratia semper iners.

Quur pigra in nobis est gratia? quòd puta nunquam

Hanc humili petimus sollicitaque prece.

Quare non petimus? quia non pro viribus, & non quòd

Toto rite Deum pectore diligimus.

Quur non diligimus? quia non cognoscimus ipsum.

Quur ita? quòd notus sit sibi nemo satis.

Quid porrò causa est, nos quòd non norimus ipsi?
 Quòd nulli cura sit sua vita sibi.
 At nostra haudquaquam quod vitæ intendimus, unde est?
 Cacatus mentis quòd nimis est oculus.
 Qui mens caca adeo est? fluxarum puluere rerum,
 Totæque terreno contemnerata luto est.
 Quæ ratio est? proprios affectus linquimus agere,
 Nolumus inque uno figere corda Deo.
 Hinc lucis nunquam sese irradiatio profert,
 Gratia & in nobis otia semper agit.

SEQUENTES VERSICULI PIAE

tantum iuuentuti conscripti, similiter omnino vt
 cantiuicula illa Natalicia, cuius initium;
 Dies est lætitiæ &c. haud inco-
 cinnè decantari poterunt.

PRECATIO ANTE

CIBVM.

DEVS qui vtilia
 Affatim largiris,
 Et qui necessaria
 Singulis partiris,
 Da esurientibus,
 Et da sitientibus
 Quod satis naturæ
 Pane corpus refice,
 Mentem verbo perfice,
 Pastor creatura.

A CIBO SVMPTO GRATIARVM

ACTIO.

REFECTIS *visceribus*

Pane corporali,
 Et imbutis mentibus
 Cibo spiritali:
 Deo de terrestribus
 Et donis celestibus
 Nunc benedicamus:
 Dominoque largiter,
 Et qui dat simpliciter,
 Grati as agamus.

PRECATIO DOMINICA.

PATER in *sublimibus*

Qui regnas & viuis,
 Nomen tuum omnibus
 Celebretur viuis.
 Regnum tuum veniat,
 Voluntas tua fiat
 Haud secus infernè
 Ipsi in terrestribus,
 Quàm sit in celestibus
 Mentibus supernè.

Panem nobis hodie
 Da quotidianum,
 Qui corpus quotidie
 Et cor seruet sanum.

*Et remitte debita
In hac vita semita,
Vt nos relaxamus
Nostris debitoribus,
Utque peccatoribus
Cuncta condonamus.*

*Ne inducas fragiles
In tentationem,
Perferamus agiles
Tribulationem:*

*Nos à malo libera,
Educ vltra sidera,
Vbi sunt beati,
Qui cantant suauiter
Laudes & perenniter,
Summa Trinitati.*

SALVTATIO ANGELICA.

*Ave plena gratia
Virgo veneranda,
Tecum agit Maria
Dominus miranda.*

*Benedicta ceteras
Mulieres superas;
Quia benedictum
Peperisti filium,
Ade qui & omnium
Soluti maledictum.*